

2

# EXHORTATION

CHRESTIENNE AV TRES-

Chrestien Roy de France, Char-  
les neuvieme,

Avec

Vne Epistre à la Reyne  
mere du Roy.



PSAL. 72.

O Dieu, donne tes iugemens au Roy, & ta iustice  
au filz du Roy.

Il iugera ton peuple en iustice, & tes pauvres en  
equité.

2



EPISTRE A LA REYNE  
mere du Roy.

**C**onsiderant, Madame, que le Roy vostre fils, pour l'excellence d'esprit, de laquelle Dieu la doué, est en ce bas aage capable de toute bonne chose. Je n'ay crain de mettre la main à la plume, pour luy faire vne petite exhortatiõ, laquelle i'ay extraicte de plusieurs passages de la sainte escriture. A fin que par icelle, il apprenne à bien, & selon Dieu, gouverner son Royaume. Ce que i'attenteroye en vain, si ceux qui ont le gouvernement de sa personne, ne m'y prestoiẽt la main, & ne m'y donnoient tout aide. Et pource, Madame, que selõ que nature vous inuite, & raison le veut, vous y tenez le premier lieu: il me semble que ie me doy sans crainte, adresser à vous, pour vous supplier, comme le plus humble de voz seruiteurs, & vous exhorter, comme celuy qui autant que nul autre, desire le bien, l'honneur, & salut, tant du Roy vostre fils, que de vous, de tellement luy recommander par vostre auctorité, & approuuer ceste mienne exhortation, que la lisant, ou oyant lire: il en puisse tirer quelque profit. Je confesse bien, Madame, qu'il y a des propos, lesquels de premiere arri-

uee, vous pourrôt sembler fort aigres et aspres.  
Mais i'espere qu'apres que vous les aurez bien  
examinez, & bien sondé la raison pour-  
quoy ie les ameine, vous prendrez le tout en  
bonne part: & trouuerez que pour bien iouer  
le personnage que'ay prins, ie ne pouuoie ne  
deuoie faire autremēt en c'est endroit, que i'ay  
fait. Or ie fay icy, Madame, le personnage, nō  
point d'un flatteur, mais d'un zelateur de l'hō  
neur de Dieu, ne desirāt rien tāt que de veoir  
la religion reformee en ce Royaume. Et pource  
qu'il appartient principalement au Roy d'y  
mettre la main, ie m'efforce & cherche tout  
moyen de l'induire à ce faire, tant par la pa-  
rolle de Dieu, que par les exemples des bōs &  
fidelles Rois, qui de leur temps ont fait tout de-  
uoir d'extirper toute idolatrie de leurs Royau-  
mes: & y redresser le vray & pur seruice de  
Dieu. Remonstrant qu'il doit plustost ensui-  
ure la foy & religion de ceux là, & de tous  
autres, qui du temps des Apostres; & apres  
ont vescu selon la forme & la reigle qui leur  
estoit baillee par l'Euangile, que de se confor-  
mer aux erreurs & superstitions introduites,  
depuis quelque temps au mōde, par l'astuce de  
Satan, & entretenues par l'auarice, ambition

& tyrânie du Pape, & de ses ministres, par  
lesquels ont esté seduits & induits, mesmes  
les Rois ses predecesseurs, iusqu'à emprison-  
ner, tourmenter, bannir & brusler les fideles  
seruiteurs de Dieu, qui, poussés par le saint  
Esprit, taschoient par vne merueilleuse ar-  
deur & constance de foy, arracher des cœurs  
des hommes, toute idolatrie & erreur, pour y  
planter la viue foy & vraye religion. Et ie  
ne doute que ces propos & autres,sembleroient  
à plusieurs trop aspres & rigoureux. Mais que  
eusse ie fait autre chose, Madame? Ayant en-  
trepris de curer vne telle apostume, eusse-  
ie seulement appliqué par dehors quelque em-  
plastre, ou lenitif, & non point plustost prins  
la lancette, ou cautere pour la percer? Il n'y a,  
ce croye ie, chirurgien, voire il n'y a mere tant  
piteuse, qui en tel cas eust pitié de son enfant.  
Or doncques telle miennne rigueur doit estre re-  
putee amitié & douceur, nō pas rigueur. Que  
si on la veut estimer autrement, i'ay le dire du  
Sage pour moy, qui me console. Correction ma-  
nifeste vaut mieux qu'amour secrette. Et les  
plaies faictes par celuy qui aime, sont fideles:  
mais les baisiers de celuy qui hayt, sont mali-  
cieux. Parquoy, Madame, ie vous supplie, ne  
A. iij.

Prov. 27.

penſer que par quelque Zele indiscret, ou par  
malveillance, ie taxe ainſi noſtre predeceſſeurs,  
ſans meſme eſpargner les Roys. Certainement  
ie ne le fay ſans bons exemples, tant des Roys  
du peuple de Dieu, que des prophetes, leſquels  
n'ont point eu crainte ne honte de condam-  
ner publicquement l'idolatrie et erreurs de leurs  
peres: comme nous pouuons Voir par ceſte belle  
1. Chr. 19. harangue, que ce bon & ſainct Roy Ezechias  
fit aux Sacrificateurs & Leuites, au commen-  
cemēt de ſon regne. Noſtre peres ont transgreſ-  
ſe, & ont mal fait en la preſence du Seigneur  
noſtre Dieu, en le delaiffant. Ils ont deſtournē  
leurs faces du tabernacle du Seigneur, & luy  
ont tournē le doſ. Et vn peu apres il adiou-  
ſte: Ainſi la fureur du Seigneur a eſtē ſur Iu-  
da & Ieruſalem, & les a baillez en deteſta-  
tion, & en eſtonnement, & en mocqueries,  
comme vous voyez meſmes de voſtre yeux. Et  
voicy, noſtre peres ſont tombez par glaiue, noſtre  
fils, & noſtre filles, & noſtre femmes, ont eſtē  
menez en captiuitē, à cauſe de cela. Mainte-  
nant donc, i'ay ce propos de faire alliance avec  
le Seigneur Dieu d'Iſrael: à fin qu'il detour-  
2. Chr 34. ne arriere de nous la fureur de ſon ire. Au-  
tant en dit & confeſſe ce ſainct Roy Ioſias;

L'ire du Seigneur, dit-il, est grande, laquelle  
est descendue sur nous, de ce que noz peres  
n'ont pas gardé la parole du Seigneur. Ce que  
le Seigneur mesme declaire plus amplement  
Un peu apres, par la Prophetesse, disant:  
Pource qu'ils m'ont delaisé, & fait encen-  
semens aux dieux estranges, pour me prouo-  
quer à courroux, en toutes les œuvres de leurs  
mains, pourtant ma fureur descendra sur ce  
lieu cy, & ne sera point esteincte. Mais les  
Prophetes sont beaucoup plus aigres & seue-  
res en leurs reprehensions, qui font aux Rois  
publicquement, & en leurs personnes. Ainsi  
qu'il appert par cest homme de Dieu, qui  
à une telle hardiesse redargua le Roy Ieroboam, <sup>3. Rois 13.</sup>  
de ce que publicquemēt sacrifioit aux idoles en  
Bethel. Et Elie embrasé, & comme transpor-  
té du zele, de l'amour & hōneur du Seigneur,  
ne craignit point se monstrier deuant la face  
du Roy Achab, cōbien qu'il luy eust la mort <sup>3. Rois 15.</sup>  
iurée, & luy dire deuant tous: Je n'ay point  
troublé Israel, mais c'est toy & la mai-  
son de ton pere, qui auez delaisé les comman-  
demens du Seigneur, & auez suivi Baalim.  
Car Achab l'auoit accusé qu'il troubloit Is-  
rael, comme coustumierement les tyrans &

leurs complices, resistans au Seigneur par leur orgueil & outrecuidance, calomniēt les vrais seruiteurs de Dieu, & les chargent cōme coupables, & cause des maux qui auiennent: combien que ce soit eux mesmes pour raison de leur idolatrie & iniquité. De semblables reprehensions vsent souuent les Prophetes. Comme fait aussi saint Iean Baptiste, Iesus-Christ, & les Apostres: voiree & les saints docteurs de l'Eglise ancienne, & entre les derniers S. Bernard. Et à la mienne volōté que depuis le tēps que les Roys & Princes Chrestiens se sont si louidemēt laissé aller au gré de Satan, en toute sorte d'abomination, ils eussent eu de tels zela-teurs de l'honneur de Dieu qui eussent crié apres eux sans rien flater. Nous ne serions certainement maintenāt en telle peine: n'est-ils les oreilles des grands, si delicates & si faciles à s'offenser, pour la moindre reprehension qu'on sache faire. Combien que desia elles doiuent estre toutes bartues des propos que ie tien en mō exhortatiō, pour en auoir ouy tāt & si souuēt parler. Or, Madame, ie pense auoir suffisamment satisfait a ce qu'on me pourroit objecter, d'estre en mō discours trop aspre & seuer. Il reste de poursuiure ce que i'auoye commencē



C'est à sçauoir de vous supplier de faire entendre au Roy vostre fils, ce recueil que ie luy ay fait, de la parolle de Dieu, à fin qu'à l'exēple des bñs Roys qui ont gouuerné le peuple d'iceluy, il apprenne à ainsi gouuerner le sien, qui est aussi certainemēt le peuple de Dieu. Ce qui vous appartient, Madame, & est vostre office plus que de nul autre: voire si vous voulez estre Vraye mere, & Vraye Chrestienne. Car toutes les saintes femmes ont prins tousiours Vne singuliere cure, d'instituer en la crainte de Dieu leurs enfans. Cōme ce sage Salomon Prouer. 13. dit auoir esté institué de sa mere, laquelle l'enhorroit à chasteté & iustice, & pour ceste cause il admoneste son fils, nō seulement à apprendre de luy, mais aussi de sa mere. Disant, Mō prou. 1. & fils garde le cōmandement de ton pere, & ne 6. delaisse point l'admonition de ta mere. Et certes l'histoire d'vn chascun des Roys du peuple de Dieu, ne fait point sans cause mention des le cōmencement, de leurs meres: mais elle veut monstrier que lesdicts Roys demeurans aupres d'lles en leur enfance, & imbuts de leurs enseignemens, & attirez par leur maniere de Viure, bien souuent deuenoient semblables à elles. De sorte que ie croy que Ezechias, Osias.

Iosias, & autres bons Roys, nonobstant l'idolâtrie & meschanceté de leurs peres, furent acheminez à la cognoissance & crainte de Dieu, principalement par l'instruction & bon exemple de leurs meres: Veu qu'il est dict d'eux, qu'encores estans enfans, ils cercherent le Seigneur, le Dieu de David leur pere. Comme au contraire il est dict d'Ochozias, que sa mere Athalia le conseilloit à faire meschammër: cõme elle estoit meschante & infidelle. Et Iustine femme de l'Empereur Valentinian, estant infectee de l'heresie Ariane, en infecta aussi Valentinian le ieune son fils: n'osant monstrier sa poison, son mary viuant, qui estoit homme fidelle & craignãt Dieu. O donc, Madame, l'enfant bien heureux, qui par la grace de Dieu est nay de bonne & sainte mere! Voire ô le Royaume bienheureux, duquel le Roy enfant, a pour mere Vne vertueuse & sainte femme! Car il n'y a rien plus certain que la mere craignant Dieu, n'a moindre soing de nourrir l'ame de son enfant, petit & tendret, de pure & sainte doctrine, que son corps de bonne & saine viande. Et certainement l'une & l'autre nourriture est beaucoup plus propre à la mere qu'au

perc: tāt pour la douceur naturelle de la mere,  
que pour sa continuelle présence: lesquelles cho-  
ses ne sont point tant communes à vn pere. Je  
vous prie, Madame, y eut il iamais laiēt qui  
peut sembler plus doux, plus delicieux et plai-  
sant, à la bouche de Salomon, que ceste parolle  
de sa mere, quād elle luy disoit Quoy mon fils? Prc. 3.  
quoy, fils de mō ventre? & quoy mō cher fils?  
Et certes ces parolles n'estoiēt point pronōcees  
de la bouche de ceste saincte Reyne, pour ami-  
gnarder son fils: ains pour doucement l'indui-  
re à aimer de bōne heure chasteté, sobrieté, in-  
stice & toute vertu & honesteté, cōme il ap-  
pert par la suite de ces parolles. De maniere q̄ 2. Chro. I.  
iaçoit que sapience ait esté donnee à Salomon,  
par le Seigneur, cōme vn dō special, ainsi que  
la saincte Escriture le tesmoigne: toutesfois on  
ne peut nier que Dieu ne se soit serui, de ceste  
saincte Dame, comme d'un trescommode &  
apte instrument, pour donner à ce ieune Roy,  
le laiēt de sa doctrine spirituelle et celeste. De-  
quoy le Royaume de Iudee luy estoit de bon  
droit grādemēt obligé, iouissant en partie par  
le moiē d'icelle, d'un tāt sage, tāt magnifique,  
tāt vertueux et pacifique Roy. Aussi ne fut il  
ingrat, ne mescōgnoissāt de ces biens qu'il auoit

reueus de sa mere, ains cōme femme vertueu-  
se & sage, l'honora iusqu'à la faire seoir sur  
3. Rois. 2. vn throne à sa dextre. Semblablement le Roy  
Dauid son pere, estimoit estre l'vn des pl<sup>s</sup> sou-  
uerains biēs qu'il eust iamais obtenu de Dieu,  
d'estre né entre le peuple du seigneur, d'vne  
femme fidelle & seruāte de Dieu. Et cela tour-  
noit il souuent à son hōneur, voire à son prof-  
fit, recommandant soy & ses affaires au Sei-  
gneur, par ceste marque, et par ce tiltre. Cōme  
quād il disoit: Donne ta force à ton serf, et sau-  
ue le fils de ta seruante. Et en vn autre lieu: Je  
psal. 86. suis ton serf, & fils, de ta seruante, comme s'il  
psal. 116. disoit: Seigneur pren moy en ta cure & en ta  
garde, car ie ne suis n'esclau, n'estranger. Je  
suis de ton peuple, voire de ta maison, & fils  
de ta seruante: nourri & instruit en ta loy, des  
mon enfance. Or comme il est certain que Da-  
uid parlant à Dieu, ne s'eust osé appeller son  
seruiteur, s'il n'eust cogneu en soy vne vraye  
fidelité & obeissāce enuers iceluy: ainsi n'eust  
il osé orner sa mere d'vn tant excellent & ho-  
norable tiltre, de seruante de Dieu, s'il n'eust  
esté asseuré qu'elle l'eust serui tresfidelemēt, en  
nourrissant mesmes ses enfans en la crainte de  
Dieu. Car quel seruice eust elle peu faire, qui

eust esté agreable au Seigneur, laissant der-  
riere celuy lequel sur tous autres, il comman-  
de si estroictement aux peres & meres, à sça- Deut. 6.  
voir d'enseigner leurs enfans à le craindre? Ce  
que l'Apostre requiert mesmes des vesues, di- 1. Timo. 4.  
sant: Si quelque vesue a des enfans ou des ne-  
ueus, qu'elle les enseigne à gouverner religieu-  
sement leur propre maison: & rendre la pa-  
reille à leurs parens. Et vn peu apres il pronõ-  
ce vne merueilleuse sentence contre ceux &  
celles qui sont nõchallãs d'enseigner leurs en-  
fans et autres domesticques. Que si aucun, dit-  
il, n'a soing des siens, & principalement de  
ceux de sa famille, il a nié la foy, & est pire  
qu'infidele. O terrible mot! que reste il donc à  
tels nonchallans, que l'horrible iugement de  
Dieu, s'ils ne s'amẽdent? Or madame, gardez  
vous d'encourir ceste tãt terrible sentence. Ne  
refusez ce tant honorable tiltre de seruãte de  
Dieu, & croyez que ne le pouuez seruir en  
chose qui plus luy plaise, que de nourrir le Roy  
Vostre fils, et ses freres et sœurs, en la cognois-  
sance de sa parolle, & en sa crainte. Mais le Exod. 4.  
Roy principalement, veu que de luy, cõme de  
tous Roys, depend à l'auenir, ou vn grãd mal  
en ce Royaume, ou vn grãd bien: vn borde-

ment de tous vices, ou abondance de toutes ver-  
tus, vn siecle de fer, ou vn siecle doré: vne de-  
pravee & toute confuse, ou vne sainte, pure,  
& vraye religion. Il faut, Madame, pource  
qu'ainsi plait à Dieu, que vous luy seruiez de  
pere & de mere. S'il est bien, & selon Dieu  
institué par vostre moyë, vous en recueillerez  
les premiers fruiçts, à sçauoir toute ioye et cõso-  
lation. S'il est autrement, avec l'ennuy & tour-  
ment que vous en receurez en ce monde, Dieu  
redemãdera son ame de voz mains. Mõstrez  
vous dès maintenãt tellement affectee enuers  
l'hõneur de Dieu, & l'auancemẽt de son Egli-  
se, que de bon droit soyez appellée nourrice d'i-  
celle, & le Roy vostre fils nourricier attẽdant  
ensemble le loyer que le Scigneur garde à ceux  
qui font leur deuoir de promouvoir sa gloire.  
Vous tenez, Madame, en vostre main le Roy  
vostre fils, pour le gouverner, gardez vo<sup>r</sup> d'en  
abuser, & principalement contre Dieu, cõtre  
ses Prophetes & fidelles seruiteurs. Vous sou-  
uienne qu'il en print mal à l'infidele et cruelle  
Iezabel: laquelle apres auoir esté iettée d'vne  
fenestre abas, & miserablemẽt meurtrie, fut  
mãgée des chiens. Gardez vous de vous esleuer  
contre la pure doctrine de l'Euangile: persecu-  
tant, et incitãt le Roy vostre fils, à persecuter

les fideles ministres d'icelle: comme fit Iustine <sup>Hist. Ecc.</sup>  
ceste meschäte et cruelle Ariane, au lieu de re- <sup>11. 15.</sup>  
cognoistre le biē & l'hōneur q̄ le Seigneur luy <sup>Hist. trip.</sup>  
auoit fait, l'esleuāt d'vn bas estat, à la dignité <sup>8. 11.</sup>  
de Reyne, voire de femme & mere d'Em-  
pereur. Mais quoy? elle & son filz receuēt  
salaire digne de leur impietē, cruauté, et perse-  
cutiō: estās tous deux cōtrains pour crainte de  
Maxime le tyrā, de prēdre la fuite, laquelle ils <sup>Hist. Ecc.</sup>  
poursuuiuoient aux sainctz Euesques et serui- <sup>11. 16.</sup>  
teurs de Dieu: et elle biē tost apres mourir mal-  
heureusemēt, & luy vilainemēt, pendu & e-  
stranglé par les ennemis que Dieu luy suscita  
d'entre ses amis et seruiteurs mesmes. Il y a eu  
par ci deuāt, et a encores à present des tyrā en  
ce Royaume: lesquels cōme ce superbe et cruel  
Aman abusa de la facilité de croire du Roy <sup>Hist. 1.</sup>  
Assuerus, pour meurtrir tous les seruiteurs de  
Dieu, ainsi abusans par ci deuāt, de la bōté &  
simplicité des Roys que Dieu no<sup>r</sup> auoit donē,  
ont esté cause d'infinites morts d'hōmes innocēs  
en ce Royaume. Mais le Seigneur, quoy qu'il <sup>Hist. 7.</sup>  
tarde, prendra telle vengeance d'eux, qu'il fit  
de celuy auquel ils ressemblent: si toutefois il se  
veut contenter de telle. Madame, ne faiētes à  
leur persuasiō, la guerre à Dieu et à ses saīctz.  
Seruez plustost d'vne pitoiable & fidelle



Hester à procurer l'accroissement de l'honneur & service du Seigneur : & à garder ses humbles & fideles seruiteurs contre la rage & oppression des tyrans, qui voudroient, à l'exemple d'un semblable à eux, que toute l'Eglise des fideles n'eust qu'un vol, pour la despescher toute à un coup. Vous avez des moyes beaucoup plus faciles, que auoit Hester. Elle auoit à faire à un homme seuer, & mari terrible: vous avez à faire à un enfant doux & amiable, voire à un filz facile & obeissant. Hester sans estre mandee du Roy, s'ingerant de parler à luy, se mettoit en danger de perdre sa vie, pour garder celle des autres. Vous auez acces au Roy quand il vous plait sans danger, & fait tout ce qu'il vous plait. De sorte, Madame, que si vous ayant si grande autorité, ne secourez aux enfans de Dieu, & ne les faietes deliurer de toute crainte & danger, Sachez que le Seigneur le fera sans vous, par autre moyen qu'il scait. Et vous n'y ayant aucun honneur, ne serez parauenture hors de peril. Doutez vous, Madame, que par la providence de Dieu, vous ne soyez paruenue en ceste autorité pour un tel temps? Voyla ce que les seruiteurs de Dieu oppressez par la tyrannie



tyrannie des meschans, & n'attendants tous les iours que la mort, vous disent. Voyla de quoy ils vous aduertissent: comme Mardochee & les autres Iuifs faisoient la Reyne Hester. Faiçtes d'oc, Madame, comme elle, faiçtes, die, que par la deliurance que vous leur aurez procuree, ils se puissent resiouir, en seruāt désormais à Dieu, en pure conscience, sans crainre & danger. Bref, faiçtes que par vostre diligence & moyen, le Roy vostre fils soit tellement instruit en la cōgnoissance de Dieu, & de sa sainte parolle, que nous voyons sous luy toute idolatrie & abomination, bannie de ce Royaume, & le vray seruice du Seigneur y estre redressé & establi. Autrement, Madame, craignez que le Roy vostre fils, estant attiré par le moyen qu'il plaira à Dieu, à la cōgnoissance de la verité, & vous demeurāt en l'erreur & superstition de noz peres, ne soye par vostre fils mesme, deposee de l'hōneur & preeminence que vous avez en ce royaume. Comme le Roy Aša inspiré de Dieu, au com- 3. Roy. 18.  
mancemēt de son regne, à destruire & extirper l'idolatrie de son Royaume, n'espargna point sa grand mere Maacha, ains luy osta la regence du pais: pource qu'elle auoit fait

Et dressé au bois vn vilain Et infame ido-  
le: lequel il mit en piéces, Et le brusta au-  
pres du fleuve de Cedron. Mais pourtant, Ma-  
dame, que ie ne vous veux ennuyer par plus  
long discours: Et que semblables propos sont  
amplement deduiets en l'exhortation que i'ay  
fait, non seulement pour estre veue du Roy,  
mais aussi de vous, et des autres qui ont le gou-  
uernement de sa personne: Je feray fin, apres  
auoir supplié nostre bon Dieu, vous faire la  
grace de vous porter en ce gouuernement, Et  
en tous autres affaires, fidelement Et heuren-  
sement, à la gloire d'iceluy, à vostre salut,  
Et à l'vtilité de l'eglise, Et re-  
publique de France.

Ainsi soit

il.

EXHORTATION CHRE-  
stienne, au Roy de France treschrestien,  
Charles neufiesme, à l'aduene-  
ment de sa couronne,

Nous remercions Dieu, Sire, que veu le commencement des graces qu'il a plantees en vous, & les trescertaines semences de vertu qui se monstrent en vostre bas aage; nous n'auons occasion de craindre de tomber au malheur, auquel est communement subiect le pais, duquel le Roy est enfant, comme dit Salomon: Ains deuous plus tost esperer vne telle prosperité & felicité que Dieu *Eccle. 10.* donna au pais de Iudée, tant soubz l'enfance de cestuy Salomon, que d'autres Roys sages & vertueux, qui regnerēt depuis luy. Et pour- *1. Roys. 3. Or 6.* ce, que c'est vne chose non moins necessaire, que desirable, pour mettre fin aux tumultes & *1. Roys. 18 22. Or 6.* diuisions: par lesquelles la tranquillité de ce royaume est, long temps a, troublee: Nous voz treshumbles seruiteurs & trefobeissants subietz, ne cessons de prier le Seigneur qu'il encline vostre cœur, veu qu'il le tient en sa main, à diligemment apprendre de sçauoir (à sa gloire, & à l'vtilité de voz subiectz) gouverner le plus noble & excellent royaume du monde: La succession duquel vous est aduenue non pas moins miraculeusement que legitimemēt, comme chascun cognoit. Qui vous doit inciter à la receuoir cōme de la main de Dieu, &

*Prout. 22*

vous y gouuerner en la maniere qu'il demãde de vous. Et pour autant, Sire, qu'entre les graces desquelles il vous a doué, vous auez le bruit de prendre plus de plaisir aux histoires de la saincte Bible, & principalement en celles des Roys, qu'en tous autres liures, il vous sera bien commode par le moyen d'icelles, d'entendre vostre royalle vocation : & à moy l'un de vos plus humbles seruiteurs, bien aisé de vous y dōner quelque secours, par ce bref recueil que i'en ay tiré: ou ie me sui, le plus que j'ay peu, accommodé à la capacité de vostre entendement, ayant aussi esgard à vostre personne. Car comme vous estes petit & grand, petit d'aage & de corpulence, mais grand d'excellence d'esprit & de royale maiesté. Aussi ay ie faict ce traicté petit, & grand. Petit de cōtenu, mais grand pour la hautesse & grandeur des parolles de Dieu qui y sont couchees. Ne me defiant ce pendant de la fidelle diligence, & de la diligente fidelité de ceux qui ont la charge de former & instituer vostre maiesté, en la cognoissance des bonnes lettres & vertus: mais plus tost desirāt par ce recueil, les releuer d'autant de peine. Aussi n'ay ie deliberé d'amaasser icy tous les preceptes, par lesquelz on a accoustumé d'instituer generally vn Roy, veu qu'il y a des liures assez qui en traictent amplement, n'estlās faictiz que pour cela. Mon dessein n'est principalement que pour vous acheminer à cognoistre, craindre, & ay-

mer Dieu: & selon sa parolle vous porter au  
gouuernemēt de vostre royaume, à l'exemple  
des bōs & vertueux Roys, lesquelz vous sont  
proposez par le S. esprit en la sainte bible.

Or, Sire, vous estes Roy, voire du plus ex-  
cellēt royaume de la chrestieté, & du plus pai-  
sible & obeissant peuple qui se puisse trou-  
uer au demeurant du monde. Mais par qui?  
par quel moyē? & à quelle fin? La sainte escri-  
ture le vous monstre, disant, puissance vous *Sap. 6.*  
est donnee par le Seigneur, & principauté par  
le souuerain. Et l'Apostre dict que les puissan-  
ces sont ordonnees de Dieu. Et certainement *Rom. 13.*  
qui est tant soit peu exercitē en la lecture de la  
sainte escripture, n'ignore point comment à *1. Rois 10.*  
la requeste du peuple d'Israel Dieu esleut & *1. Roys 15.*  
feit oindre par Samuel Saul premier Roy *1. Roys 16*  
sur ce peuple là. Et comment par l'ingratitu-  
de & desobeissance dudit Saul, Dieu le re-  
iecta, & iceluy encore viuant & regnant, feit  
oindre par ledict Samuel, Dauid Roy sur  
Israël: lequel apres la mort ignominieuse de  
Saul, regna en Hebrō, & puis apres en Ierusa- *1. Rois. 31.*  
lem. Et pource que le Seigneur le trouua *2. Roys 2.*  
selon son cœur, c'est à dire humble, obeissant, *2 Roys. 5.*  
le craignant & gardant d'un cœur parfaict ses  
commandemens & saintes ordonnances, non  
seulement il le benist & dōna prosperité à son *1. Roys. 7.*  
regne, mais aussi feit avec luy alliance, laquel- *Psal. 139.*  
le il conferma par promesse & iurement, que *Psal. 132.*  
les filz qui viendroient de luy & des siens, luy

succederoiét au royaume. Et qui plus est, que de luy & de sa race procederoit le Roy des Roys, par lequel toute gent recepueroit benedictiō & salut. Et ce qu'il luy promit, il le tint:

2. Roys. 1. faisant regner apres luy son filz Salomon, &  
3. Roys. 11. apres Salomon Roboam son filz, & ainsi consequemmēt les autres. Lesquelz aussi se humilians, recognoissoiēt volontiers & confessoiet tenir leur royaume de la main de Dieu. Cōme Dauid, quād il disoit, le seigneur Dieu d'Israël m'a esleu de toute la maison de mō pere pour estre Roy sur Israël à tousioursmais. Et Salomon priant & remerciant le Scigneur, Tu as, disoit il, faict grand' grace à Dauid mon pere, & m'as ordonné Roy en son lieu. De maniere que s'il aduenoit que le peuple rebellant se cōstituaist vn autre Roy, comme il feit au temps de Roboam, le reiectant & essiant Ieroboam. Le Roy ainsi debouté voulāt r'appeller & rallier à soy le peuple, luy reduisoit en memoire ceste alliance de Dieu avec la posterité de Dauid. Comme le Roy Abia, parlant ainsi. O Ieroboam & tout Israël, escoutez: Ne vous appartient il pas de sçauoir que le seigneur Dieu d'Israël a donné le royaume à Dauid sur Israël à tousioursmais, à luy & à ses filz sur l'alliance perpetuelle & inuiolable? Mesmemēt les Roys Payens ont cogneu & cōfessé tenir leurs royaumes de Dieu, comme nous lisons de Cyrus, qui confessoit que le seigneur Dieu du ciel luy auoit dōné tous les royaumes de la terre. Mais
1. des Chro. 18.  
1. Chro. 11.  
1. Chro. 13.  
1. Esd. 1.

à fin que ne reiections le tesmoignage d'un  
Payen, oyons celuy de Daniel l'un des grands *Dan. 2.*  
prophètes de Dieu parlant au Roy Nabuco-  
donozor. Tu es, disoit il, le plus excellent de  
tous les Roys: auquel le Dieu du ciel a donné  
regne, puissance, force, & gloire. Mais il ne  
m'est ia besoing pour la preuue de mon dire,  
vous amener tant de tesmoignages des Roys  
estrangers: veu que vous mesmes, Sire, à l'exē-  
ple de vos predecesseurs Roys de France, con-  
fessez tous les iours infinies fois au commen-  
cement de voz lettres royaux, estre Roy par la  
grace de Dieu. Certes, Sire, ceste recognois-  
sance est bien Chrestienne, & telle confession  
est fort louable: pourueu qu'elle vo<sup>e</sup> sorte d'un  
cœur aymant & craignant Dieu, & non pas  
seulement de la main de voz secretaires, ou  
d'une coustume venue de voz ancestres. Com-  
me le nom de Treschrestien, lequel à eulx & à  
vous est donné d'ancienneté, est tresbeau &  
digne d'un Roy, si toutefois les faitz sont cor-  
respondans au nom. Mais il est fort à craindre,  
veu la vie d'une grand part de voz predeces-  
seurs, qu'ilz ayent esté soulemēt Treschrestiens  
de nom. Ce qui aura esté plus à leur honte &  
condemnation, qu'à leur honneur & salut. Et  
que Dieu les ait fait Roys plus par courroux,  
que par sa grace & faueur. Comme il dict par  
le prophete Osee, parlant de Saul, qu'il auoit *Osee 13.*  
donné au peuple d'Israël un Roy en son ire, &  
leur auoit osté en son indignation. Ce qui est  
B.iiij.



*Iob. 34.*

confirmé en general de tous meschans Roys en l'histoire de Iob, ou il est dict, que le Seigneur fait regner l'hôme hypocrite pour les scandales du peuple. Je prie Dieu, Sire, tant pour le regard de vous que de nous, que vous ne soyez du nombre de telz môstres de Roys:

*Dent. 28.*

à fin que vous & nous ne passios par vne mesme condemnation: selon que long temps a, la sentence en est prononcee du grand iuge. Or donc, Sire, vous entédez que Dieu vous a faict Roy: mais ce n'est point assez. Il fault aussi que vous sachiez quel Roy il veult que vo<sup>s</sup> soyez. Escoutez donc, s'il vous plait, ce qu'il vous dict & commande en sa sainte loy. Quand

*Dent. 17.*

ainsi sera que le Roy sera assis sur le throsne de son royaume, lors il escrira pour soy ceste loy en vn liure, de par les sacrificateurs Leuitiques, laquelle il aura avec soy, & la lira tous les iours de sa vie: à fin qu'il apprenne à craindre le seigneur son Dieu: & qu'il garde toutes les paroles de ceste loy, & ses ordonnances pour les faire. A fin qu'il n'esleue point son cœur sur ses freres: & qu'il ne se destourne de ce commandement à dextre, n'a fenestre, à fin qu'il dure longuement en son royaume, luy & ses filz au milieu d'Israel. Ce bon & saint Roy Dauid leur, retint, & accomplit si diligemmēt ces saintz commandemens & ordonnances diuines, qu'il fut aymé & loué de Dieu: voire proposé & baillé à tous les autres Roys comme vn miroer ou patron de toute fidelité &



saincteté. Et premieremēt à Salomon son filz,  
le Seigneur luy faisant telle promesse & pro-  
testation. Si tu chemines deuant moy comme  
ton pere Dauid a cheminé deuant moy d'un  
cœur entier & droit, faisant tout ce que ie t'ay  
commandé, & gardant mes constitutions &  
iugemens, ie confermeray le throne de ton  
royaume sur Israël à iamais, comme i'ay parlé  
à ton pere Dauid, luy disant. Ie ne feray point  
defaillir successeur de toy, estant assis sur le  
throsne d'Israël. Aussi ce bon & fidele serui-  
teur de Dieu Dauid ne se monstroït point in-  
grat ne mesconnoissant de ces benefices, ains  
procuroit de tout son pouuoir l'aduancement  
de l'honneur du Seigneur, exhortant son filz Sa-  
lomon de se gouverner en l'administration de  
son royaume en toute integrité, & priant le  
Seigneur luy en faire la grace. Toy mon filz  
Salomon, disoit il, cognoy le Dieu de ton pe-  
re, & sers à luy de cœur parfaict, & de coura-  
ge volontaire: car le Seigneur Sonde tous les  
cœurs, & entend toutes les imaginations des  
pensees. Si tu le cherches tu le trouueras: mais  
si tu le delaisse, il te debouterà eternellement.  
Ie prie le Seigneur qu'il te donne intelligence  
& prudence, à fin que tu puisses regir Israël, &  
garder la loy du seigneur ton Dieu. Et alors  
tout te succedera heureusement, quand tu ob-  
serueras & accompliras les ordonnances & iu-  
gemens, lesquelz le Seigneur bailla à Moysse  
pour Israël. Et toy ô seigneur Dieu d'Abrahā,

3. Roys. 9.

1. Chr. 28.

2. Chr. 22.

2. Chr. 29.

Isaac & Israël noz peres, donne vn cœur parfait à mon filz Salomon, à fin qu'il garde tes commandemēs & tes tesmoignages & tes ordonnāces, & qu'il face toutes les choses, & qu'il edifie la maisō que i'ay apprestee. O que ce ieune Roy Salomon estoit heureux d'auoir Dieu pour remonstreur & cōseiller, & vn tant bon & sage pere pour enseigneur & pedagogue, priāt pour luy & moyēnāt enuers le Seigneur. Que le Seigneur luy mōstra vne grāde faueur, quand il luy donna à cognoistre combien est grande & difficile à porter la charge du gouuernement d'vn tel royaume? De sorte que par ce moyē se desfiāt de sa force & capacité, pria au Seigneur luy assister, & dōner intelligence de s'y porter comme il estoit requis. Mais il vaudra mieux de mettre icy sa tāt sainte prie-

3. Roys 3. re. Maintenant, Seigneur mon Dieu, tu m'as fait regner moy tō seruiteur, en la place de Dauid mon pere: & ie suis vn petit iuuenceau, qui ne sçay ny aller ny venir: & tō seruiteur est au milieu de ton peuple, que tu as esleu, qui est vn grād peuple, qui ne se peult cōter ne nombrer, tant est en grand nōbre. Dōne dōc à ton seruiteur vn cœur qui soit entēdu à iuger ton peuple, & cognoistre le biē d'entre le mal: Car qui pourroit iuger ce tien peuple qui est en telle multitude? Il y a vne autre oraison au liure de la Sapiēce qu'on luy attribue. Et pource quelle est merueilleusement belle & digne d'estre dicte tous les iours par vous, Sire, & tous bons

roys, ce ne m'a semblé estre chose superflue de  
la coucher en ce lieu. O Dieu des peres, & Sei- *Sap. 9.*  
gneur de misericorde qui as fait toutes choses  
par ta parolle: & par ta sâpièce as ordonné l'hô-  
me à fin qu'il dominast sur les creatures, qui  
sont faictes par toy, & gouuernast le mōde en  
saincteté & iustice, en dōnât iugemēt en droi-  
ture de cœur: Donne moy celle sâpience qui  
se tiēt assise pres de tes throsnes, & ne me for-  
clos point du nōbre de tes enfans: car ie suis tō  
seruiteur, filz de ta seruante, hōme foible & de  
petite duree, & encor moindre en intelligence  
de iugemēt & de loix. Car nonobstât q̄ quel-  
qu'un fust parfait entre les hōmes, si ta sâpièce  
n'y est, il ne sera riē estimé. Tu m'as esleu pour  
Roy de ton peuple, & pour iuge de tes filz &  
de tes filles: Tu m'as dict que i'ediffiasse vn tē-  
ple en ta sainte montaigne, & vn autel en la  
cité de ton habitation, qui fust à la similitude  
de ton saint tabernacle, que tu as préparé des  
le commencement: & avec toy ta sâpience,  
qui cognoit tes œuures: laquelle aussi estoit  
presente, alors que tu faisois le monde: & sçait  
ce qui est plaissant à tes yeux, & ce qui est droit  
selon tes commandemens. Enuoye la de tes  
sainctz cieux, & du siege de ta gloire, à fin  
qu'estant avec moy, elle s'employe à trauail-  
ler & ie sache ce qui est agreable deuant toy.  
Car elle sçait & entend toutes choses: & me  
cōduira sagement en mes faictz & me gardera  
par sa maiesté. De sorte que mes œuures serōt

bien receues, & gouuerneray iustement ton  
peuple, & seray digne des sieges de mon pere.  
Car qui est l'homme qui pourra sçauoir le con  
seil de Dieu? ou qui pourra pēser ce que Dieu  
veut? Car les pēsees des hommes mortelz sont  
mal asseurees, & nos inuentions incertaines:  
d'autant que le corps qui est corruptible agra  
ue l'ame, & ce tabernacle fait de terre trauaille  
l'esprit chargé de soucy. A grand peine pou  
uons nous comprēdre ce qui est en la terre, &  
ne pouuons trouuer sans difficulté & trauail  
ce que nous auons en la main. Et qui est celuy  
qui a cogneu de poinct en poinct les choses  
qui sont es cieux? Qui est celuy qui a entendu  
ton conseil, si tu ne luy as donné sapience, &  
ne luy as enuoyé ton saint esprit des lieux  
treshautz? Car c'est par ce moyē que sont dres  
sez les sentiers de ceux qui habitent sur la ter  
re, & que les hommes apprennent ce qui t'est  
agreable, lesquelz sont sauuez par ta sapien  
ce. Vous voyez, Sire, qu'en ces belles prieres  
ce ieune Roy ne demande rien à Dieu sinon  
sagesse & prudēce, pour sçauoir regir son peu  
ple, & gouuerner son royaume. Ce qui pleust  
fort au Seigneur, comme dict l'histoire, en la  
quelle il parle ainsi audict Salomon. Pourtant  
que tu as demandé cecy, & n'as point deman  
dé de viure long temps, & n'as point deman  
dé des richesses pour toy, & n'as point deman  
dé la mort de tes ennemis, mais as demandé co  
gnoissance pour entēdre droicteure, voicy i'ay

fait comme tu as demandé, voici ie t'ay don-  
 né vn cœur sage, & entendu, tellement qu'il  
 n'en a point esté de semblable deuant toy, ne  
 tel que toy ne sourdra apres toy. Mesmes ce  
 que tu n'as point demandé, ie le t'ay ottroïé, à  
 sçauoir richesse & gloire: tellement qu'entre  
 les Rois il n'y aura point de semblable à toy  
 durant tous tes iours. Et si tu chemines en mes  
 voyes, que tu gardes mes statutz & comman-  
 demens, comme ton pere Dauid a cheminé, ie  
 prolongeray tes iours. En quoy nous voyons  
 accôplir ce que le seigneur Iesus-Christ pro- *Matth. 6.*  
 met, Demãdez premieremēt le regne de Dieu,  
 & la iustice d'iceluy, & toutes choses vous se-  
 ront baillées auec. Mais voyons des autres bōs  
 Roys. Il est escrit que le Seigneur fut auec Io- *2. Chr. 17.*  
 saphat, pource qu'il chemina es voyes de Da-  
 uid son pere, & ne cercha point les Baalins,  
 ains il cercha le Dieu de son pere. Il est aussi *2. Chro. 26*  
 dict de Osias, qu'il cercha Dieu au temps de  
 Zacharie le prophete: & en ces iours qu'il cer-  
 cha le Seigneur, il luy dōna prosperité en tous  
 ses affaires. Il reste maintenāt, Sire, de parler de  
 Iosias, sur lequel i'ay delibéré principalement  
 m'arrester. Car combien que Ioas commen-  
 çant de regner à l'aage de sept ans, ait perseue-  
 ré quelque temps en la crainte de Dieu, & en *4. Rois. 12*  
 l'obseruation de ses saintes ordonnâces, tou- *2. Chr. 24.*  
 tefois il se changea tellement apres la mort de  
 Ioiada grand sacrificateur, son maistre & gou-  
 uerneur, qu'il ne merite point d'estre mis au

reng des bons Roys. Pareillement combien  
que, selon le tesmoignage de l'escripture, il n'y  
*2. chro. 29.* ait eu Roy en Ierusalem pareil à Ezechias, ny  
deuant luy ny apres, toute fois pour la confor-  
mité de vostre aage & de vostre esprit à celuy  
de Iosias, & pour le desir que i'ay qu'en tou-  
*2. chro. 34.* tes autres choses vous luy resembliiez, i'ayme  
mieux le vous proposer pour vn certain patrô  
& exemple de vertu, qu'aucun des autres. L'hi-  
stoire donc deuât que rien specifier faisant vn  
sommaire de toute sa vie, dict qu'il auoit huiet  
ans quand il commença de regner : qu'il regna  
en Ierusalem trente & vn an, & feit ce qui e-  
stoit droit deuant le Seigneur : Et cheminant  
es voyes de Dauid son pere, ne declina ny à  
dextre ny à Senestre, Apres venant l'historien  
à la particularité, adioust que la huitieme an-  
nee de son regne, estant encor enfant, commē-  
ça de chercher le Dieu de Dauid son pere. Et la  
douziesme annee, il commença à nettoyer Iu-  
da & Ierusalem, des haultz lieux, & des bois,  
& des Images de taille & de fonte : & demolit  
on en sa presence les autelz des Baalims : & feit  
briser les simulachres qui estoient en hault par-  
dessus iceux. Il rompit aussi les bois & les Ima-  
ges de taille & de fonte, & les diminua, & les  
espendit sur les tombeaux de ceux qui leur a-  
uoient sacrifié. Or, Sire, trois manieres de par-  
ler sont icy à noter, qui sôt fort vsitees en l'hi-  
stoire des Roys de Iuda & d'Israel : A sçauoir  
faire ce qui est droict en la presence du Sei-

gneur: Cheminer es voyes de Dauid, & chercher le Seigneur. Qui ne signifiēt autre chose que cognoistre, aymer, craindre, & adorer vn seul vray Dieu, & obseruer d'vn cœur parfait ses saintes ordonnances, & ne se point souiller par Idolatrie aux abominations des Dieux estranges, ains les fuir, & detester, & procurer de tout son pouuoir que toute telle iniure faicte à Dieu, soit extirpee: Ainsi que nous pouuons veoir, par cy dessus, qu'a fait ce bon Roy & les autres desquelz nous auons fait mention. Comme au contraire l'escripture parlant des Roys infideles & Idolatres, dict, qu'ilz ont fait mal en la presence du Seigneur: qu'ilz n'ont point cheminé es voyes de Dauid, ains qu'ilz ont cheminé es voyes de Ieroboam, & des Roys d'Israel: & qu'ilz n'ont point préparé leurs cœurs à chercher le Seigneur. Pour exemple, il est dict de Roboam qu'il fit mal en la presence du Seigneur pourautant qu'il ne prepara point son cœur à songneusement le chercher. Item de Zambri, lequel assiegé en la ville de Thersa, & voyant qu'elle estoit pres d'estre prinse, entré dedans le chasteau, se brusla avec la maison royale: & mourut pour les pechez qu'il auoit commis, faisant mal desplaisant au Seigneur, & cheminant en la voye de Ieroboam, & es pechez qu'iceluy fit, faisant pecher Israel. Mais tout cela est beaucoup plus clairement demonstré en l'histoire de Manasses Roy de Iuda qui fit mal

2. chro. 16.

3. Rois 16.

2. Chro. 33.



deuant le Seigneur, selon l'abomination des  
 Gentilz, que le Seigneur auoit destruits deuant  
 les enfans d'Israël: & retourna edifier les haultz  
 lieux, que Ezechias son pere auoit demolis: &  
 dressa des autelz aux Baalins, & feit des bois  
 sacrez, & adora tout l'exercite du ciel, & luy  
 seruit. Il edifia des autelz en la maison du Sei-  
 gneur, delaquelle le Seigneur auoit dit, mon  
 nom sera en Ierusalem à iamais, & ce qui s'en-  
 suit. Et puis pour conclusiō de ce propos dict,  
 Manasses donc feit errer Iuda, & les habitans  
 de Ierusalem: tellement qu'ilz feirent mal, plus  
 que les Gētilz que le Seigneur auoit destruitz  
 deuant la face des enfans d'Israel. Par tous ces  
 passages, Sire, il est assez manifeste, que faire ce  
 qui est mal deuant le Seigneur, ne le point cer-  
 cher, & cheminer es voyes de Ieroboam &  
 des Roys d'Israël, n'est autre chose qu'aban-  
 donner le Seigneur, & suiure les Dieux estran-  
 ges: c'est à dire s'abandonner à Idolatrie, qui  
 est la source de tous pechez, & qui plus de-  
 plaist au Seigneur: lequel comme le mary de sa  
 femme, est ialoux de nous, ne pouuant souffrir  
 que l'hōneur & obeissance, laquelle à luy seul  
 est deüe, soit baillee à vn autre, cōme le mary  
 n'endureroit point la chasteté que luy doibt  
 garder sa femme, estre prostituée à qui que ce  
 soit, & pource Idolatrie en l'escripture est ap-  
 pellee paillardise & adultere, auquel s'estant  
 long temps plongee la fille d'Israel ou Sama-  
 ric comme femme impudique, & ne s'en vou-  
 lant

*Exod. 10.*

*Dent. 6.*

*Iug. 8.*

*1. Chro. 5.*

*2. Chro. 21.*

*Hier. 13.*

*Ezechiel.*

*16. 23.*

*Osee. 2.*

*Apoc. 2.*

*14. 18.*



lant retirer quelques remonstrances que luy  
fissent les Prophetes, & seruiteurs de Dieu, en  
la parfin elle fut du tout & pour iamais repu- *Voyez le*  
diee & chassée. Et la fille de Iuda ou Ierusalem *23. d'Es-*  
imitant la paillardise d'Israel, & ne s'amendant *chiel.*  
point pour quelque punitiō qu'elle veit auoir *4. Rois. 25.*  
esté faicte d'icelle, fust aussi enuiron cent ans  
apres repudiee & chassée par son mary le Sei- *1. Esdr. 7.*  
gneur Dieu. A laquelle toutefois septante ans  
apres fait misericorde, la reuoquant & faisant  
retourner de la captiuité de Babylone en Ie- *Genese 12.*  
rusalem. Et ce pour la promesse qu'il auoit fai- *22. 26. 31.*  
cte à ses seruiteurs, Abraham, Isaac, Iacob, & *Psalm. 89.*  
Dauid De la semence desquelz il vouloit que *Psalm. 132.*  
son filz le Sauueur du monde nasquist selon la  
chair, au temps, & au lieu qu'il auoit prescrit.  
Et est à noter qu'encore que Dauid, & autres  
bōs Roys, ayent quelquefois peché fort lour-  
demēt, toutefois l'escriture proposant vn som-  
maire de leur vie, dit qu'ilz ont fait ce qui e-  
stoit droit deuant le Seigneur: pour monstrier  
qu'eux estans enfans de Dieu, & luy gardans  
fidelité en vraye & pure adoratiō, telz pechez  
estoiēt couuers: & ne leur estoiēt point im-  
putez. Mais retournons à nostre petit Roy Io-  
sias: duquel a esté dict que le huitiesme an de  
son regne, estant encore enfant, il commença  
de chercher le Dieu de Dauid son pere. Certai-  
nement ce fut vn grand honneur & louange à  
ce ieune Roy, de chercher Dieu en son enfance  
veu principalement que la religion & seruice

de Dieu estoit en ce tēps-la tout gaste & cor-  
 rōpu: cōme nous verrons maintenant. Et pour  
 mieux dire, ce fut vne grand' misericorde de  
 Dieu, de laquelle il vſa enuers son peuple, &  
 ce ieune Roy, quand il luy donna, & à ses Cō  
 seillers & gouuerneurs, vne telle lumiere en  
 si espesles tenebres. Mais pourquoy cercha il  
 le Dieu de Dauid son pere, qui auoit esté si lōg  
 tēps auparauant: & non point plus tost le Dieu  
 d'amon son pere, qui estoit n'agueres decedé?  
 C'est ce que i'auoye commencé de dire, que  
 la bonté & misericorde de Dieu y reluist mer-  
 ueilleusement, quand il ensuiuit plus tost la  
 pureté de seruir à Dieu, qu'il auoit entendu  
 estre en Dauid, que l'Idolatrie laquelle il auoit  
 n'agueres veue en Amon son pere, duquel est  
 dit, qu'il feit ce qui estoit mauuais deuāt Dieu,  
 comme auoit fait son pere Manasses, & sacri-  
 fia à toutes les images que son pere auoit fai-  
 ctes, & les seruit. Et ne fut point humilié deuāt  
 le Seigneur ainsi que Manasses son pere, com-  
 bien qu'il offensast grādement. D'icy nous ti-  
 rons vn tresbon enseignement & fort neces-  
 saire en ce temps, à sçauoir que quand à la re-  
 ligion & seruice que deuons à Dieu, il nous cō-  
 uient reigler & gouuerner selō la regle & ma-  
 niere de faire, que nous trouuons la plus pure,  
 & la plus conforme à la parolle de Dieu & à  
 ses sainctes ordonnances, Comme estoit celle  
 de Dauid entre les Iuifz; & celle des Apostres  
 & de la primitiue Eglise entre les Chrestiens.

Et deuons opposer ceste reigle à vne trespesti-  
fere & non moins sotte opinion, de ceux qui  
obstinement disent qu'ilz veulēt viure & mou-  
rir en la foy de leurs peres, entendans de ceux  
qui auenglez & abusez cōme eux, sont morts  
depuis trois iours, par maniere de dire. Et à la  
mienne voluntè qu'il n'y eust que le simple  
vulgaire qui fust enuelopé en cest erreur: il se-  
roit beaucoup plus aisé d'y remedier. Mais  
nous voyons vne grand partie des Roys, Prin-  
ces, Magistras, voire des Euesques & Prelats,  
& mesmes des Docteurs & prescheurs estre  
rouchez de ceste maladie: Desquelz les vns y  
sont poussez, & entretenus par ignorance, su-  
perstition, non chaloir de cognoistre la verité,  
& trop grande simplesse de croire aux abu-  
seurs, les autres par avarice & ambition: les au-  
tres par malice, auenglement, sens reprouué, &  
efficace d'erreur. Mais ce n'est riē de nouueau.  
Il y a eu de tout temps des trompeurs & des  
trompez: comme du temps des prophetes de  
Dieu, les faux prophetes, & ceux qui leur adhe-  
roient. Du temps de Iesus-Christ les scribes & *Matth. 23.*  
Pharisiens, qui le reprenoiēt, mesme de ce que  
ses disciples ne gardoient point les traditions  
& ordonnances des anciē, c'est à dire des res-  
ueurs & imposteurs, qui pour establir leur su-  
perstitions & abus, auoient corrompu la loy  
& les saintes ordonnances de Dieu: comme  
leur reproche le Seigneur. Telz sedueteurs fai-  
soient vn grand mal à l'Eglise du temps des  
C.ij.

2. *Thim. 3.* Apostres, & leur donnoient de grans traux  
& empeschemens. Desquelz & de leur secta-  
teurs l'Apostre dict, En telle maniere que Ian-  
nes & Iambres ont resisté à Moyse, pareille-  
ment aussi, iceux resistent à la verité : hommes  
corrompus d'entendement, reprouuez quant  
à la foy. Et comme voulant môstrer que tous-  
iours y aura de telz monstres au monde, dict  
apres, Les mauuais hommes & deceueurs pro-  
fiteront en pis, abusans & estâs abusez, & cer-  
tes en la primitiue Eglise, les heretiques pour  
confermer leur erreur, se vâtoient souvent de  
leurs peres. Comme Eleusius Euesque Arrien  
n'eust point de honte de dire en plein Cōcile,  
que luy & ses compaignons garderoient ius-  
qu'à la mort la foy de leurs peres. Mais com-  
me dict Socrates qui a escrit ceste histoire, cō-  
ment appelloit il ceux-la peres veu que luy &  
eux auoient renié leurs peres? à sçauoir les bōs  
& vrays Euesques desquelz ilz auoient esté  
instruits en la foy, deuant qu'ilz tumbassent en  
erreur. Ainsi ceux de ce temps font bouclier  
de leurs peres, par lesquelz ilz entendēt les Pa-  
pes, les Moynes, les Docteurs questionnaires &  
Sorboniques, qui ont depuis quatre ou cinq  
cens ans, controuué & forgé vne doctrine to-  
talement repugnante & contraire à celle des  
Prophetes, des Apostres, & saincts Docteurs  
anciēs: & ont de telle sorte corrompu & adul-  
teré la parolle de Dieu, les saincts sacremens,  
& la pure doctrine de l'Eglise ancienne, qu'ilz

*Hist. trip.*  
*lib. 5. cha.*

24.

ne sont point moins pernicleux qu'estoient les  
faux prophetes, les Scribes & Pharisiens, & les  
heretiques : comme lon pourra euidentement  
cognoistre, si leur doctrine est confrontee à  
celle qui nous a esté baillee es liures de l'ancien  
& nouveau testament, & en ceux que nous  
ont laissez les saincts docteurs, succeisseurs &  
imitateurs des Apostres. A cause dequoy ilz  
ne meritent rien moins q̃ le nom de peres: sinõ  
parauanture de peres de mensonge & erreur,  
ce qu'ilz ont commun avec le diable. Estans  
pour vray enfans illegitimes, & bastards, for-  
lignás, & laissant les bons preceptes & la saine  
doctrine de leurs vrayz peres. Or pēsez donc,  
Sire, s'il vous plait, quelz peuuent estre les di-  
sciples de telz docteurs, & quelz les filz de telz  
peres : Et considerez quel danger c'est d'en-  
fuiure ceux qui ont esté imbutz de leur doctri-  
ne, & nourris en leurs abus : comme ont esté  
noz peres, ayeulx, & bisayeulx. Et pource il  
nous fault confesser, que ce ieune Roy Iosias  
fut bien inspiré de Dieu, quand il prefera la re-  
ligion de Daud, laquelle il cognoissoit estre  
selon Dieu, à celle de son pere, & de ses an-  
cestres, laquelle il voyoit desplaire à Dieu. *Luc. 14.*  
Sui-  
uāt ce que le Seigneur Iesus-Christ nous com-  
māde, c'est qu'en tel cas, il nous fault haïr pere  
& mere: & ce que dit l'Apostre, qu'il faut plus  
tost obeir à Dieu qu'aux hommes. *Actes 5.* O que ce  
Roy & tous autres à luy semblables eussent  
esté malheureux si opiniaistrement ilz feussent

demeurez aux erreurs de leurs peres? Mais que dirôs nous de noz predecesseurs, de ceux di-ie qui ont premierement créu à l'euangile? s'ilz eussent esté obstinez iusqu'à ne vouloir changer de religion, voulant viure & mourir en celle de leurs peres, que serions nous à ceste heure, si on ce qu'ilz estoient pour lors, c'est à dire payens & infideles, gens sans Dieu en ce monde, comme dict l'Apostre, sans Christ, & attente de salut? Certainemēt, Sire, si nous voulons suiure la foy & religion de noz peres, desquelz selon la chair nous sommes sortis, c'est bien chose raisonnable que nous sui- uions celle des premiers: desquelz ne fault doubter que la doctrine ne fust trespure, & la vie tressaincte: veu quilz eurent pour leur premier maistre & enseigneur Crescens l'un des cōpaignōs de S. Paul, lequel vint en ce païs de Gaulle, cōme tesmoigne Eusebe en l'histoire Ecclesiastique. Car quāt à ce qu'on dit S. Denis Areopagite y estre venu avec ses compai- gnōs, il est mal aisé de le croire: attendu qu'il fut euesque d'Athenes en son païs, cōme dit ledict Eusebe. Or Dieu besongna tellemēt en ce païs en peu de temps, par le moyen & mini- stere de ses fideles seruiteurs, qu'un peuple in- numerable embrassant l'Euangile, renōça à la religion, ou (pour mieux dire) à la superstition & abus de ses peres. De sorte que Satan ne pou- uant endurer vne sienne telle perte, suscita les ministres de sa rage, les tyrans contre les serui-

*Ephes. 2.*

*Liure. 3.  
chap. 4.*

teurs de Dieu : pour par force & violence de  
tormens, abatre leur foy: Ainsi que nous lisons  
en ladicte histoire, que fit l'Empereur Antoni-  
nus Verus, es villes de Lion & de vienne pour  
lors les pl<sup>r</sup> celebres de toute la Gaule, & n'est  
à doubter que lors & depuis n'y eust d'autres  
grandes persecutions en beaucoup de lieux de  
ce royaume. Par lesquelles toutefois ne la foy,  
ne le nombre des fideles, ne fust diminuë, ains  
croissoit de plus en plus. Bien est vray que les  
Roys de Frâce vindrēt bien tard à la cognois-  
sance de l'Euangile. Car comme disent noz  
histoires, Clouis fut le premier Roy Chrestie,  
qui commença de regner l'an de Iesus-Christ  
cinq cēs douze. Auquel temps tout estoit desia  
fort corrompu en la religion Chrestienne, &  
icelle fort eslongnee de la pureté de la primi-  
tiue Eglise: à sçauoir du tēps que noz ancestres  
receurent la foy. Lesquelz, Sire, pour la cause  
susdicte ie suis d'aduis que vous ensuiuiez plus  
tost que lesdits Roys, encore que parauēture  
ilz fussent gens de basse condition, Combien  
que vous n'ayez point faute de Rois treschre-  
stiens que puissiez imiter, qui ont regné en ce  
royaume: comme l'Empereur Constantin le  
grād, Cōstantin son filz, Theodose le premier  
& le second, Gratian, Valentinian, & Iouian,  
&c. La religion desquelz estoit autant differēte  
à celle de ceux qui ont regné depuis cinq ou  
six cēs ans, qu'est la lumiere aux tenebres. Car  
de ce temps-là, l'auarice, l'ambitiō & tyranniē



du Pape n'estoit point encore desbordée par le monde: L'imposture des casars n'estoit encore sortie du puis de l'abisme infernal, pour seduire les hōmes: L'idolatrie enuers les saints & leurs images n'auoit encore gagné lieu es temples des Chrestiens: Le purgatoire n'estoit encore cogneu: la marchandise des messes avec la prophanatiō de la sainte cene du Seigneur, n'auoit encore enforcélé tous les royaumes de l'Europe. Et pour dire en vn mot, ces tenebres d'ignorance, d'erreurs, de superstitions, & de tout gēre d'impieté, qui en ces derniers temps ont occupé & gagné tout le monde, estoient encore cachees, les empeschant de sortir la splendeur de l'Euangile. Mais depuis elles se sont tellement espandues par tout, que l'Euangile en est demeuré obscurci: la foy toute eclipsée: Iesus-Christ & le merite de sa mort enseuely, caché & incogneu. Et ne se faut esmerveiller, Sire, si le bastiment de ces abominatiōs est si fort, & de si longue duree: veu qu'une grand partie des hommes y a mis, & encore y met la main. Les vns edificans & entretenans l'edifice, comme le Pape, les Cardinaux, les Euesques, toute la moynerie & prestaille. Les autres fournissans l'argent, & contribuans aux despens: comme les Rois, Princes, Gentilzhōmes, Marchans & gens mecaniques. Et ce qui donne courage à chascun d'eux d'y bien faire son deuoir, est pource que par ce moyen les vns se baissent les meilleures cuisines, & les



plus sumptueuses tables que toute la reste du monde. Et les autres. pour fournir à l'appoinctement, à la persuasiō des autres, se promettēt paradis: estās desia, comme il leur semble, mōtez au ciel par ceste tour de Babel. A fin aussi que ceux cy ne pensent perdre leur salaire en ce siecle mesme, ceux-la leur promettēt qu'ilz receuront icy cent pour vn en toute felicité, prosperité & santé. Et encor pour mieux faire venir l'eau au moulin, ilz commencent d'immortalizer leurs noms en ce monde, les appellans tant en particulier qu'en public, leurs bienfacteurs, les fondateurs de tel ou de tel lieu. Et de ces beaux tiltres sont tous farciz leurs registres. Et les tableaux de leurs cloistres & temples ne chātent autres chansons. Sur ceste mesme enclume, Sire, a esté forgé ce beau tiltre de treschrestien: que les Papes ont donné, voire bien cher vendu aux Roys de France. Car le Roy Pepin à la requeste du Pape, mena vne grosse armee en Italie, autant en feit apres son filz le Roy Charlemaigne, dont ilz chasserent les Lombars de certaines villes, qu'ilz mirent en la main du Pape, pour engresser le siege Apostolique: leql à fin quil ne se mōstrat ingrat, doua de ce beau tiltre ces deux Roys & tous leurs successeurs. Toutefois depuis, tant pour monstrer comment & pourquoy il ayme les Roys de France, que pour coulourer par pretexte d'ancienneté, sa volerie, il a attribué ceste donation à Constantin, & en a priué voz an-

cestres. Lesquelz ce nonobstât, ont esté depuis si simples & superstitieux, que non seulement ilz ont ignoré ou dissimulé le tort qu'ils auoient receu de luy, mais aussi luy ont enuoyé iusqua present, presque tout l'or & l'argent de France, pour achepter de luy les eueschez & abbayes, qui deuoient estre cōferees sur le lieu pour rien par gens de bien, à gens de bien. Cōme si ce n'estoit vn assez grand mal, d'auoir esté premierement cause d'engendrer vn tel mōstre, si puis apres ne nourrissoient, & entretenoiēt, & fortifioiēt de plus en plus sa rage & cruauté. Certainement, Sire, pour dire ce qui en est, les Roys, Princes, Gentilzhommes, & tous autres grans & puissans en biens, ne se peuuent excuser deuant Dieu, de n'auoir mal & iniustement dispensé les biens de Dieu, quand en fraudant leurs heritiers, ou les vrais pources, & membres de Iesus-Christ, ilz en ont nourry l'oisiueté, paillardise & toute meschanceté de ces ventres paresseuz de moynes: entretenans ce pendant par ce moyen leur Idolatrie, & infinies abominations, & iceux se laschās la bride à toute vilanie & meschanceté sans aucune crainte de Dieu, soubz vne vaine & diabolique esperance d'aller tout droit en Paradis pour leurs bienfaitz: Ou pour le pis, & pour le plus, passer par le feu de purgatoire. Ces erreurs donc ainsi plantez es cueurs des hommes, & tant songneusement entretenus par les vns & par les autres, ont tel-

lement prins racine, que tous ceux qui se sont efforcez de les arracher, ont esté tenus & condânez pour heretiques. Vray est que le nombre d'iceux a esté bien petit, iusques au temps que le Seigneur prenant pitié de son peuple, suscita en Alemaigne quelques siens fideles seruiteurs, qui sans crainte des hommes, decouurirent & monstrerēt au doigt l'abus de la Papauté: & declarerent publiquement, tant par sermons que par liures, en quoy gisoit nostre salut, à sçauoir en la grace de Dieu, par Iesus-Christ. Contre ceste doctrine, combien que ce fust celle mesme des prophetes, des Apostres, & de toute l'Eglise ancienne, S'opposa & s'arma incontinent le Pape, avec toute sa bande de Caphards, tempestant, & criant que c'estoit vne doctrine nouvelle, erronee, scandaleuse, scismatique, & heretique, & qu'il la failloit extirper: & qu'à ce faire, tout le monde deuoit mettre la main. Dont pour monstrec le chemin aux autres, il la condamna pour heretique, & la fulmina par excommunication, & tout premier alluma les feus, incitant tous les Roys, Princes, Seigneurs & Magistrats de la Chrestienté, à esteindre ceste nouvelle doctrine, par dispute de glauiues, bourrees & fagots. De maniere que bien tost tous les Parlements & Cours, furent empeschees des causes & proces des Lutheriens (car ainsi nommoit on, ceux qui soustenoient ceste doctrine, ou bien nouveaux Chrestiens.)

Et pour y mieux vquer, & plus depescher de  
matiere, furent nouuelles chambres erigees,  
qu'on appella ardantes, Bref toutes les prisons  
furent remplies de ces pources seruiteurs de  
Dieu, tant d'hommes, que de femmes & d'en-  
fans. Et toutes les places & carrefours des vil-  
les teinctz de leur sang, & semez de leurs cen-  
dres. Je prie le Seigneur Dieu, Sire, qu'il luy  
plaise tellement vous assister par sa grace, & a-  
uec telle efficace vous enseigner par son saint  
Esprit, que ne souillez vostre regne du sang  
des Saints: Ainsi qu'ont fait, pour ne vous  
rien flatter, aucuns de vos ancestres, au grand  
preiudice de leurs biens & honneur, voire de  
leurs corps: comme chascun sçait, & comme  
tout le monde a cogneu. Et à la mienne volō-  
té que ce ne soit aussi de leurs ames. Je supplie  
aussi le Seigneur & Dieu de misericorde, qu'il  
yse de sa grace enuers vous, & nō de sa rigueur  
& iustice, visitant & punissant en vous les pe-  
chez de vos parens, ainsi qu'il menasse en la  
loy de visiter les pechez des peres sur les en-  
fans, en la troisieme & quatrieme generation  
de ceux qui le haïssent. Ce qu'il fait quelque-  
fois exerceāt sa iustice: & quelquefois aussi ne  
le fait pas, demonstrent sa misericorde. Quand  
est du premier poinct, les filz de Saul Roy de  
Iudee, & ceux de Ieroboā & d'Achab Roys  
d'Israël nous seront pour exemple: lesquelz  
par le commandement de Dieu, furent exter-  
minez pour les pechez de leurs peres. Au con-

Exod. 10.

1. Roys.

21.

3. Roys.

14.

4. Roys 10.

traire, Ezechias filz d'Achas, & nostre petit roy  
Iofias filz d'Amon, tous deux Roys de Iudee,  
trouuerét misericorde enuers le Seigneur. Car  
comme ils furent par sa grace preseruez de l'i-  
dolatrie & meschanceté de leurs peres, aussi ne  
tomberent ils point au mal-heur & ruine, que  
leurs peres leur auoient merité pour leurs pe-  
chez. Et ainsi, Sire, i'espere, voire ie vous asseu-  
re qu'il sera fait de vous : & non seulement de  
vous, mais aussi de voz enfans qui sortiront de  
vous, s'il plait au Seigneur vous en dōner. L'en-  
ten si vous aimez & craignez Dieu, cōme ont  
fait ces bons Roys. Car en telle sorte il le vous  
promet, disant: Qu'il fera misericorde aux fils  
de ceux qui l'aimeront, en mille generations.  
Vous auez peu entendre, Sire, iusques icy, qu'à  
l'exēple des bons Roys de Ierusalem, des Em-  
pereurs premiers Chrestiens, qui ont regné en  
ce royaume, & de tous ceux qui premieremēt  
en ce païs sont venus de la loy Payēne, à la foy  
Chrestienne, vous pouuez sans scrupule de con-  
science, laisser la fausse religion, qu'ont depuis  
quatre ou cinq cens ans inuentee les caphards,  
pour la tripe: Combien que voz predecesseurs  
seduitz par eux, l'ayēt maintenue: Ce permet-  
tāt Dieu, pour punir l'ingratitude & prodigieu-  
se nonchalance du mōde, à cognoistre la veri-  
té. Et ne deuez doubter, ne craindre de chāger  
la doctrine fausse & diabolique, à la vraye &  
diuine, laquelle le Seigneur par sa misericorde,  
a depuis quelque temps, restituee par le mini-

*Ephes. 1.*

stere de ses fideles seruiteurs: cōbiē que tout le monde se soit bādē contre elle, taschāt l'opprimer & esteindre par emprisonnements, tortures, confiscations de biens, banissemēts, feus, & toute sorte de tourmēts: mais n'ayāt en la parfin gaigné autre chose, sinō que par ce moyen ils luy ont acquis vn tel accroissemēt, qu'il n'est maintenant possible d'arrester son cours: non plus q̄ de garder vne riuere desbordee, de rōpre & passer p̄ dessus toutes les leuees & chaussees. Ce qui peut assez seruir de preuue suffisante, q̄ ceste doctrine est la seule q̄ Dieu approuue, & par laquelle il veut, Maugré Satā & tous ses ministres de mēsonge, que Iesus-Christ sō filz regne en ces derniers tēps, es cœurs de ceux qu'il a esleus en iceluy, deuant la fondation du monde. De maniere que facēt les persecuteurs & tyrans du pis qu'ilz pourrōt, si est-ce qu'ils ne profiteront rien, sinon d'irriter & prouoquer l'ire de Dieu, qui cōduit cest œuvre, alencontre d'eux, estans en la fin contrains de quitter toutes leurs entreprises, & de laisser faire les plus forts: ainsi qu'ont faict les tyrās en l'Eglise ancienne. Et n'est ia besoing, Sire, de vous arrester à vn tas d'allegations friuoles, que les aduersaires de verité ont accoustumé de faire, assauoir, qu'une coustume de lōg temps, & de tous reccüe, doit estre tenue pour loy: & que pour rien on ne la doit rompre. Item qu'il n'est point possible que Dieu ait si lōg temps laissé errer son Eglise. Il n'est mestier de lōgue respō

se. Si vne coustume est bonne, & establie selon  
Dieu, on la doit garder inuiolablement. Mais  
si au contraire elle est mauuaise, & cōtre Dieu  
comme est ceste cy, on ne la sçauroit trop tost  
laisser, pour le danger qui gist en lobseruation  
d'icelle. Et pour fermer toute bouche contredisante à la verité: Christ n'a pas dit qu'il estoit  
la coustume, mais la verité, comme disoit ce  
sainct martyr Cyprian, respondant à semblable  
obiection, que font aujourd'huy nos aduersaires.  
Et pour response au second argument: Dieu a  
laissé bien plus long temps tout le monde en  
erreur & idolatrie, exceptee la maison d'Abraham.  
Que dirons nous de toute la Grece, de l'Orient, & autres païs, lesquels apres auoir  
esté long tēps des premiers & principaux sieges de la  
Chrestienté, fondez par les Apostres, se sont, par vn  
iuste iugemēt de Dieu, depuis si long temps alienez de  
la verité de Iesus Christ, pour prendre la vanité de  
Mahomet & des Turcs? Pourquoi le Seigneur les a il si  
loignement laissez en leurs erreurs? Nous ne sçaurions  
autre chose respondre, sinon qu'il a eu iuste cause de  
ce faire, pour leur ingratitude & meschanceté. Mais  
ceste mesme cause, & parauenture beaucoup d'autres  
plus grandes, ont esté en noz predecesseurs: pour  
lesquelles ilz ont esté iustement delaissez de Dieu.  
Et pour ce nous ne deuons prendre leurs fautes pour  
couvrir & excuser les nostres, mais plustost louer  
Dieu de son iuste iugement, sur eux:

*Psal. 81.*

*Act. 14.*



& le remercier, qu'il luy a pleu par sa clemen-  
 ce & bõté, nous faire cognoistre leurs erreurs,  
 & les nostres: & nous en retirer par l'illumina-  
 tion de son saint Esprit, & par l'efficace de sa  
 parole. Dauantage nous apprenons, tant par  
 les histoires, que par les choses que nous voyõs  
 tous les iours aduenir, que les Roys ont esté  
 bien souuët cause, que ce qui auoit esté, ou par  
 eux, ou par autre cõmençé, auoit apres vn lõg  
 traict, & duroit long temps: principalement si  
 c'estoit quelque chose de meschant. Comme  
 3. Roys 12. l'idolatrie que trouua & commença Ieroboam  
 premier Roy d'Israël, edifiât deux temples, &  
 y mettant des veaux d'or, contre le comman-  
 dement du Seigneur, dura iusqu'à la fin & rui-  
 ne totale dudit royaume: pource que tous les  
 Roys ses successeurs, prenãs le mesme chemin,  
 idolatrerent comme luy, & induirent le peu-  
 ple, par leur exemple, à suiure leurs abomina-  
 tions. Semblablement l'heresie des Ariens, cõ-  
 mencee par vn prestre d'Alexandrie, nommé  
 Hist. eccl. Arius, fut d'autant de plus lõgue duree, qu'elle  
 10. 1. & eut des plus grans & puisãs Empereurs, avec  
 Theodoret. leurs femmes, & infinis Euesques d'Oriët, qui  
 1. 2. 23. 4. luy fauoriserent, & la soustindrent. Il ne se faut  
 412. donc esmerueiller, si ces nouueaux erreurs in-  
 troduits en l'Eglise, par le Pape & ses suppos,  
 ont eu si longuement leur regne, veu que tous  
 les Roys & Princes, iusqu'à present, les ont  
 maintenus & defendus, par glaiues & feus.  
 Mais c'est bien chose digne d'admiration, &  
 non

non pas moins de lamentation, qu'il a esté publiquement permis depuis trente ou quarante ans, de corriger, renouueller, & ramener à l'antiquité, toutes les sciéces & disciplines, tât humaines que mecaniques : la seule doctrine de l'Euāgile n'a eüē ceste permissiō d'estre remise en son entier, ains il a esté defēdu d'y toucher. Les liures des Poētes, Orateurs & Philosophes prophanes, voire les statues, & peintures, pour l'antiquité, ont esté bien receues, & cherement estimees & vendues: les liures des Prophetes & Apostres, pour estre illustrez de quelque traduction nō accoustumee, ou nouueaux cōmentaires, ne sentās rien toutefois que la pure antiquité, ont esté reiettez, defendus & bruslez. Tout interprete ou professeur de Grāmaire, Rhetorique, ou Medecine, voire tout Architecte & bastisseur à l'antique, a esté le bien venu, & richemēt salarié, iusques à empoigner eueschez, abayes & priorez: les seuls lecteurs, docteurs & prescheurs de lātique verité, & de la vraye antiquité, ont esté ou chassez & bānis, ou emprisonnez, & cruellemēt meurtris. N'est-ce point cas merueilleux, que vostre ayeul Roy d'vn si excellent esprit, vostre pere, tous les grans Seigneurs, mesmemēt les Cardinaux & Euesques, ont ( depuis le temps que Dieu nous a restitué l'Euāgile, abbatu presque tous les chasteaux & palais faits à la moderne, pour les retourner bastir à l'antique: & ont fait conscience d'abattre & demolir, voire tant soit peu, remuer & tou-

cher les modernes erreurs, la nouuelle doctrine, & religiō (quelque anciēne qu'on la vueille dire) pour restaurer & remettre sus la vraye & ancienne? Ils ont dauātage bien voulu renouveler & reuoker à l'antiquité l'art militaire, la maniere de fortifier & réparer villes & chasteaux: mesmement les armes & instrumens de guerre, iusques à leur changer leurs noms, & n'ont peu trouuer bon de destruire & aneantir ceste nouuelle façon de chasser & vaincre Satā, peché, le mōde & la chair, par l'eau qu'ils appellent beniste, par messes, voyages, cōfrairies, & mille autres superstitions & abominations, qui seruēt plus pour retenir & pour fortifier cōtre nous les ennemis, que pour les chasser, affoiblir, ou surmonter. Ils n'ont voulu, di-je, changer ces armes de papier, à celles qui sont plus fortes que d'acier: & par lesquelles tous noz capitaines & soldats anciens ont vaincu le diable, & tous les autres aduersaires: à sçauoir l'escu de la foy, le glaue de l'esprit, qui est la parole de Dieu, le baudrier de Verité, le hallecret de Iustice, le heaume de salut. Bref vne viue & parfaicte esperance, & asseurance des promesses de Dieu, vne parfaicte charité, vne fidele & continuelle oraison, avec vne perpetuelle mortification. Et qui plus & pis est, on n'a eu honte en ce royaume, qui n'est toutefois que trop superbe, d'apprendre des Italiens, Alemans, Anglois & autres estrangers, toutes choses qui ont semblé bel-

*Ephes. 6.*

es & bonnes en eux, iusques à leurs vices: mais  
l'apprendre, & de prendre d'eux vne refor-  
mée doctrine & religion, on en a eu vergogne.  
Et pour finir ce propos, Sire, le Pape, les Car-  
dinaux, Euesques, Abbez, & tous Caphars qui  
tiennent le demeurant du monde en erreur,  
sont bien contens, & se trouuent fort bien de  
crocheter force benefices, & amasser force  
biens pour tenir bonne table, pour iouer, chas-  
ser, brauer, & paillarder: bref, de faire tout à la  
nouuelle mode: mais d'estudier, de prescher, &  
faire tous les autres actes requis, qui sont de la  
vraye antiquité, ils n'y veulent penser, ils ne  
veulent rien innouer. Mais pource que telz E-  
picuriens ne se reformēt iamais d'eux mesmes,  
non plus que les putains du bordeau, c'estoit  
l'office de voz predecesseurs, de les cōtraindre  
à faire leur deuoir. Et s'ils ne le vouloient, ou  
pouuoient faire pour leur meschâceté ou igno-  
rance, d'en mettre en leurs lieux d'autres capa-  
bles & idoines: comme ils sçauoient bien faire  
de leurs capitaines, & autres officiers, es affaires  
qui ne sont point tāt necessaires, ne de telle im-  
portance. Et pourtant, Sire, que le pouuās, &  
deuās faire, ils ne l'ont fait, ils n'ont certes peu  
euitter le iugement de Dieu: qui est chose fort  
à craindre & redouter. Car comme dit l'Apo- *Heb. 10.*  
stre, c'est chose horrible de tomber es mains  
de Dieu viuant, Parquoy à fin qu'à vostre e-  
scient, vous ne vous iettez en ce peril, met-  
tez y l'ordre que le Seigneur demâde de vous,

& que vostre charge requiert, à l'exēple de nostre ieune Roy Iosias lequel, cōme nous auōs veu, ne douta d'effacer de la memoire & cognoissance des hōmes, les idoles & abominatiōs qu'auoiēt dressees son pere & son ayeul en Ierusalem, & toute Iudee, pour y redresser & establir le seruice de Dieu, en la pureté que Dauid & les autres bons Roys, de toute anciēneté auoiēt laissé à leurs successeurs. Mais retournōs s'il vous plait à l'histoire, & reprenōs ce qui est dict de luy: c'est, que l'huitiesme an de son regne, estāt encor enfant, il commença à chercher le Seigneur, & la douziēse annee il commēça de nettoier Iuda & Ierusalem de toute abomination. Nous auons dit que c'est de chercher le Seigneur. Mais cōmēt, dira quelcun, le peut il chercher, trouuer, cognoistre, & aimer, veu qu'il n'auoit point le liure de la Loy (comme nous vertons apres) lequel estoit cōmandé aux Roys, de lire tous les iours, pour par iceluy sçauoir ce que le Seigneur cōmādoit? cōme nous auons veu cy dessus. Il fault q̄ nous croiōs qu'il n'estoit point si enfant, qu'il n'eust desia entēdu de quelque homme de biē, qu'il peut auoir eu pour gouuerneur, ou de q̄lques autres craignās Dieu, cōme il reserue tousiours quelques vns, qui au milieu des idolatres, retiēnēt entiere fidelité au Seigneur: il pouuoit, di-ie, auoir entēdu, ou appris par autres liures de la S. Bible, la maniere de chercher Dieu, & cheminer es voyes de Dauid: qu'il sçauoit auoir esté agreable au

Seigneur, pour la cōstante fidelité & ardāt ze-  
le qu'il auoit tousiours mōstré enuers ses cōman-  
demens & sainctes ordonnances. Il peut estre  
aussi que sa mere estāt fidele, & craignāt Dieu,  
l'enseigna en derriere du Roy son mary, à co-  
gnoistre & craindre le Seigneur: cōme il est aus-  
si vray semblable q̄ les autres meres fideles ont  
fait de leurs enfans, ce qu'on peut cognoistre  
par ce qu'il est fait cōmunemēt mention d'elles  
es liures des Rois. Et par ce que Salomō demō- *Prou. 31. 1.*  
stre en ses prouuerbes, que luy & sō filz ont esté *6.*  
enseignez de leurs meres. Certainement la ma-  
niere de proceder de ce ieune enfāt biē notee,  
vous pourra, Sire, beaucoup profiter. Quand  
l'histoire dit qu'il cercha Dieu, elle monstre le  
feruēt desir, le grād soing, diligēce & ardeur de  
foy qui le menoit: & son allegresse, cōstānce &  
perseuerāce est cogneue, par ce qu'il continue  
ceste estude depuis le 8. an de sō regne, iusques  
au 12. auquel temps il commēça à pratiquer ce  
qu'il auoit apprins, mettant la main à l'œuure.  
Qui mōstre bien qu'il ne cōmençoit vne telle  
besongne à la vollee, mais avec grāde maturité  
& prudence, que le Seigneur par son S. Esprit  
luy administroit. Mais quelle besongne cōmā-  
ce-il? de destruire du tout l'idolatrie: qui est ou-  
rage vrayement appartenāt à vn Roy, & sans  
lequel elle ne peut estre totalement extirpee,  
quād de long temps elle a prins racine. O dōc  
œuure vtile & necessaire! Car par l'idolatrie  
l'hōneur de Dieu est mis deffous les pieds, fauf-

seté preferee à verité, la creature au createur, le  
 diable à Dieu. Mais ie vous prie, Sire, confide-  
 rez vn peu la ferueur de ce ieune Roy, il demo-  
 lit, & rasa tout iusques à terre, bois, chapelles,  
 autelz, idoles: & ayant tout cela reduit en pou-  
 dre, l'espart dessus les tõeaux de ceux qui leur  
 auoient sacriifié: à fin de faire plus grande igno-  
 minie aux idoles, & aux idolatres: & par mesme  
 moyé les faire hair & detester au peuple. Il fait  
 bien d'auâtage, il brusle les os des prestres & sa-  
 crificateurs, dessus les autels de leurs idoles: à  
 Nomb. 19. fin de les polluer & souiller: pourautant q̃ tout  
 ce qui touchoit au corps morts estoit pollu &  
 souillé. Et ne se cõtête point de purger & net-  
 toyer de toute abominatiõ, Iuda & Ierusalem,  
 il fait le mesme aux villes de Manassé, Ephraim  
 & Simeõ, iusqu'à Neptalin. De sorte qu'il abat,  
 brise, & redige à neant tous les autels, idoles &  
 bois par toute la terre d'Israel: & puis s'en re-  
 tourne en Ierusalẽ. O noble & vertueux Roy!  
 il ne s'attẽd point à ses seruiteurs, pour faire vn  
 cœuure tant excellent & vrayement royal. Il y  
 assiste luy mesme, & y met la main, voire l'espa-  
 ce de six ans. Quoy faisant, il raporte plus loua-  
 ble victoire, & acquiert plus d'hõneur, que s'il  
 auoit cõquesté par armes vn mōde: ayãt chassé  
 de tãt de païs infinis diables, & gaigné vn peu-  
 ple innumerrble au Seigneur. Biẽ est vray, que  
 (comme nous auõs touché cy dessus) Dieu ne  
 pouuãt plus souffrir l'idolatrie des dix lignees,  
 c'est à dire du royaume d'Israel, les auoit rui-



nees du tout, les enuoyāt captiues en Assyrie.  
Et cōbien que la desolation fust merueilleuse-  
mēt grāde, si en demeura il quelques vns, mais  
en petit nōbre. Cōme le mōstre Amos le pro- *Amos. 1.*  
phete par vne similitude, par laq̃lle il dit qu'il  
fut alors ainsi d'Israël, cōme si vn liō auoit de-  
uoré vne brebis: de la gueule duq̃l le berger en  
auroit retiré & recouuré deux iambes, ou vne  
partie de l'oreille. Mais ce petit nōbre cōme il  
aduient cōmunemēt, creust, & avec luy l'idola-  
trie: laquelle si de lōg temps au parauant n'eust  
pris tant auāt racine, ne deuoit point repullu-  
ler: veu q̃ ce bō Roy Ezechias quelque tēps au *2. Chr. 30.*  
parauāt, auoit prins tāt de peine à l'arracher. Et  
que Dieu auoit fait vne telle punition de leurs  
cōpagnons pour ceste mesme cause. Or donc, *4. Rois 17.*  
Sire, tant Ezechias que nostre ieune Iosias, ont  
laissé vn notable exemple à tous Roys, quand  
pour amplifier la gloire de Dieu, & promou-  
voir l'vtilité des prochains, ils n'ont eu seule-  
mēt soing de nettoyer l'idolatrie de leurs roy-  
aumes, mais aussi les païs de leurs voisins qui  
estoiēt demeurez comme brebis esgarees sans  
pasteur. En quoy ils ont demōstré quelle foy  
ilz auoiēt enuers le Seigneur, & quelle charité  
enuers les hōmes. Plus i'entre en ceste histoire,  
& plus ie trouue en ce ieune Roy de graces de  
Dieu, & vertus dignes d'estre imitees, nō seule-  
ment des Roys, mais aussi de toute maniere de  
gens. De sorte q̃ par tous ses actes, il se monstre  
estre vrayement fils de Dieu, poussé & mené

*Deut. 12.  
14.16.*

par l'Esprit de Dieu & de foy, à n'estre point oisif, ains à s'emploier de mieux en mieux, à l'œuvre du Seigneur. Car estant venu à la dix-huitiesme année de son regne, apres auoir ainsi nettoyé la terre de Iuda & d'Israël, & le temple pareillement, il mit toute sa cure à restaurer & racoustrer la maison du Seigneur. Laquelle, son ayeul & son pere auoient laissée en ruine. Et certes cest esprit ainsi emflambé à aduancer la gloire de Dieu, ne s'eust peu contenter d'auoir destruit les lieux ou le Seigneur estoit blasphemé & offensé, si quand & quand il n'eust donné ordre, que la maison ou il souloit estre loué, serui & adoré, fust reparee. Et aussi ce n'eust point esté assez fait à luy, d'oster au peuple le moyen de seruir au diable, s'il ne luy eust aussi donné le moyen par son exemple mesme, de purement seruir à Dieu, au lieu qu'il auoit ordonné. Car il n'estoit loisible à ce peuple, de rendre ses vœus & sacrifices au Seigneur, selon sa fantasie : mais seulement au lieu que le Seigneur auroit choisi, & qu'il auroit commandé : à sçauoir, au temple de Ierusalem, ou il estoit enioinct à tous les Iuifs & Israelites, de se trouuer aux trois grandes festes de l'an, pour là inuoyer le nom du Seigneur : Qui n'estoit point sans mistere. Car par ce temple, Iesus Christ estoit figuré : auquel & par lequel seul eux & nous, c'est à dire tout le peuple de Dieu le deuons inuoyer & honorer par sacrifices de louange O combien

grand desir auoit ce ieune Roy, de veoir ce temple reparé, & remis en son premier estat! non pas qu'il se souciaſt fort de la beauté de l'edifice materiel: mais du ſeruice de Dieu qui s'y ſouloit faire du temps des bons & fideles Roys: à l'imitation deſquelz il ne deſiroit rien, tant que de ſe trouuer en ce temple, avec le peuple fidele: pour là inuoquer tous d'un cœur, le nom du Seigneur. Dequoy luy auoit ſerui pour principal exemple, ſon grand pere Dauid: lequel tout le temps qu'il fut contrainct d'eſtre abſent de Ieruſalem, tant pour la cruelle poursuite de Saül, que pour la conuiration, & outrage d'Abſalon ſon filz, on ne l'oyt rien regretter, que la maiſon de Dieu, & la compagnie des fideles. Toutes ſes plainctes, tous ſes ſouſpirs tendent là. On ne luy oyt faire mention en ſes complainctes, de femme ny d'enfans, ny d'autres choſes, tant luy ſoient cheres. Combien que pour lors le temple ne fuſt baſti en ceſte magnificence: ains y auoit ſeulement vn tabernacle, ou le peuple ſ'aſſembloit pour inuoquer le Seigneur: ioinct que l'Egliſe de ce temps là, eſtoit fort meſlee de meſchans & infideles, comme eſtoit Saül, Abſalon, & leurs adherens. Mais pource qu'il eſtoit aſſeuré, que Dieu auoit au milieu des hypocrites, ſa petite troupe, qui l'inuoquoit en pureté de conſcience, à laquelle il ſ'adioignoit, & de corps & d'eſprit: il laiſſoit les autres au iugemēt de Dieu, ſ'aſſeurāt de la faueur

*Pſ. 41. 34.*

d'iceluy enuers soy, & tous autres qui chemi-  
noient droictement deuât luy. Dont nous ap-  
prenons, Sire, que là est vrayement l'Eglise de  
Dieu, ou sa sainte parolle est purement pres-  
chee, & ses sacremens & saintes ordonnances  
tenues & gardees, selon l'institution du Sei-  
gneur. Et à telle Eglise chascû se doit adioin-  
dre, cõme membre d'un mesme corps, souz vn  
mesme chef, qui est Iesus-Christ. Cõbien que  
toute l'assemblee ne soit entierement pure &  
nette de beaucoup de taches & pechez, cõme  
le froment n'est point sans yuoye. Voila dõc,  
Sire, comment ce ieune Roy estoit diligent, &  
feruent à procurer la gloire de Dieu, son salut,  
& celuy de son peuple. Il reste maintenant  
de veoir, comment le Seigneur augmẽta en luy  
ses graces: ainsi qu'il a de coustume de faire à  
tous ceux qui n'en sont ingratz. Il s'ensuit dõc  
en l'histoire, que Helchias principal sacrifica-  
teur, ayant trouué le liure de la Loy caché de-  
dans le temple, l'enuoya au Roy par Saphan  
Scribe: lequel leut ledict liure deuant le Roy.  
Nous voyons icy, Sire, premierement l'astuce  
& meschancetẽ de Satan, lequel pour enuelo-  
per tout le monde es tenebres d'ignorance &  
tout erreur, persuada aux meschans & infidel-  
les Roys, qui auoient regnẽ au parauant, de  
cacher le liure de la loy, Par lequel, cõme nous  
auons veu, le Seigneur cõmandoit, que le Roy  
apprint de le craindre, & obseruer ses statuts  
& saintes ordonnances: & que par icelluy

e peuple se gouuernast en ce qu'il doit à Dieu  
& à son prochain. Priué donc le Roy & le  
peuple de la cognoissance de la loy, com-  
ment eussent ilz peu cheminer deuant Dieu  
en telle droicte & perfection qu'il deman-  
de? Et nous & noz peres, en quelles tenebres  
sommes nous demeurez, en quelles super-  
stitutions & erreurs nous a detenuz Satan par cy  
deuant, & encore à present detient vne grand'  
partie du monde, par le moyen & ayde de  
ses ministres les faux prophetes & caphars,  
qui ont caché la sainte bible, & principale-  
ment le nouveau testament, voire qui ont en-  
seuely Iesus-Christ nostre sauueur, redem-  
pteur, & mediateur? Or loué donc soit Dieu;  
par iceluy Iesus-Christ, qui nous a regardez  
en pitié, comme il feit ce bon Roy, nous ren-  
dant ce saint liure, par lequel, aidant le saint  
esprit, nous sommes illuminez en sa cognois-  
sance, pour acquerir salut. Or Iosias ayant en-  
tendu les parolles de la loy, rompit ses ve-  
stemens: & puis commanda à Helchias & à  
quelques autres, disant, Allez, & enquerez  
vous du Seigneur, pour moy, & pour le re-  
ste d'Israël & de Iuda, touchant les parolles  
de ce liure, qui a esté trouué. Car l'ire du Sei-  
gneur est grande, laquelle est descendue sur  
nous: de ce que noz peres n'ont pas gardé la pa-  
rolle du Seigneur, pour faire selon tout ce qui  
est escrit en ce liure. Nous voyons, Sire, par  
cette grande tristesse & espouuentement qui

faisit ce bõ Roy, quelle est la nature de la loy: laquelle monstrant, comme dedans vn clair miroer, à l'homme son peché, le rend merueilleusement estonné & abatu: ne pouuant porter le iugement de Dieu, & l'enfer qu'il voit luy estre desia préparé: De sorte qu'il tomberoit en vn horrible desespoir, s'il n'estoit incontinent soustenu par la foy: qui luy monstre vn Dieu misericordieux & fauorable: Cõme il fait à ce bõ Roy. Lequel comme reuenue à foy, & bien esperant de la bonté de Dieu, fait enquerir du Seigneur pour foy & pour son peuple. Mais quelqu'un pourra demander, pourquoy il ne confesse point ses pechez, & ceux de sõ peuple, estre cause de l'ire de Dieu, comme ceux de leurs peres? certainement il ne se faist point de ses fautes, & de celles de son peuple pour se vouloir tellement iustifier deuant Dieu, qu'ilz n'ayent aucunement peché: mais sachant que Dieu ne punit aucun peché plus griefuement qu'Idolatrie, en laquelle leurs peres auoient esté tellement debordez, eux au contraire en auoient esté preseruez par la grace de Dieu, il ne craint de confesser deuant Dieu, que leurs peres auoient merité vne grosse punition, & eux aussi à cause d'iceux, si le Seigneur ne leur eust fait misericorde, comme il appert par la responce de la prophetesse: Le Seigneur, dit elle, le Dieu d'Israël dit ainsi: dictes à l'homme qui vous a enuoyez à moy, Ainsi dit le Seigneur, voicy ie feray venir mal-

heur sur ce lieu cy, & sur les habitans : à ſçauoir toutes les maledictions qui ſont eſcriptes en ce liure, qu'on a leu deuant le Roy de Iuda, pource qu'ilz mont delaiffé, & ont fait encēſemens aux Dieux eſtranges, pour me prouoquer à courroux en toutes les œures de leurs mains. Pourtant ma fureur deſcēdra ſur ce lieu cy, & ne ſera point eſteinte, Mais au Roy de Iuda qui vous a enuoyez pour chercher le Seigneur, vous direz ainſi, Le Seigneur, le Dieu d'Iſraël dit ainſi. Quant aux parolles que tu as ouyes, pourtant que ton cœur a eſté amolli, & que tu t'eſ humilié en la preſence de Dieu, quand tu oyois ſes parolles contre ce lieu cy, & contre ſes habitans, que tu t'eſ humilié deuant moy, & as rompu tes veſtemēs, & as pleuré deuant moy, ie t'ay auſſi exaucé, dit le Seigneur. Voicy, ie te recueilliray avec tes peres, & ſeras r'aſſemblé en paix en ton ſepulchre: & tes yeux ne verront point tout le mal que ie doy faire venir contre ce lieu cy, & contre ſes habitans. Voila, Sire, vn treſcertain teſmoinage, non pas d'un homme, mais de Dieu, qu'Idolatrie eſt vn peché tant execrable deuant Dieu, qu'il ne peut demeurer impuny, quoy que tarde la punition. Helas, Sire, s'il eſt ainſi (comme certainement il eſt) de quelle punition eſt digne ce royaume, & nous les habitās, pour les enormes Idolatries & horribles abominations qui ſ'y ſont commiſes par cy deuant, & ſ'y commettent encore? Certainement ie



ne doute que pour ce peché & pour infinis autres qui en procedent, toutes les guerres & tous les autres maux que nous & noz peres auons endurez & endurons tous les iours, sont venus sur nous par le iuste iugement de Dieu. Et est à craindre que son courroux n'estant encore appaisé, ne nous aduienne beaucoup pis: si à l'exemple de ce bon Roy, nous ne laissons premierement nostre Idolatrie, & puis pleurons noz pechez, rompans, non pas noz vestemens, mais noz cœurs, plus durs que pierre: & nous humilians sans feintise deuant Dieu, luy prestions à l'aduenir toute obeissance: voire faisans paction avec luy, de iamais ne retourner à Peché, moyennant sa grace: Ainsi que nous verrons tantost auoir fait ce ieune Roy, avec tout son peuple. Car apres auoir entendu par ses gens, le propos que le Seigneur luy mandoit par la Prophetesse, il enuoya & assembla tous les anciens de Iuda & de Ierusalem: & monta en la maison du Seigneur, & avec luy tous les hommes de Iuda, & les habitans de Ierusalem, à sçauoir les Sacrificateurs Leuites, & tout le peuple, depuis le plus grand iusqu'au moindre. Et eux escoutans, leut toutes les parolles du liure de l'Alliance, lequel auoit esté trouué en la maison du Seigneur. Et le Roy estant aupres de sa colonne, feit alliance deuant le Seigneur de le suiure, & garder ses commandemens & tesmoignages, & ses statutz de tout son cuer, &

de toute son ame: en faisant les choses de l'alliance qui sont escrites en ce liure. Et y feit recorder tous ceux qui auoient esté trouuez en Ierusalem & en Beniamin. Et les habitans de Ierusalem firent selon la paction de Dieu, de Dieu de leurs peres. Je ne me peux assez esmerueiller, Sire, de l'ardeur de foy & du zele de ce ieune Roy, n'estudiât à autre chose qu'à l'accroissement de la gloire de Dieu, & au profit spirituel tant de foy que de son peuple. Il ne se contente point d'auoir ouy lire vne fois en son priué, le liure de la loy: il le lit luy mesme publiquement. Il fait en cela certainement acte d'un bon chef, & d'un vray Roy: voire d'un vray pasteur, n'ayant moindre soing du salut de ses brebis, que du sien propre. Et luy semble bien peu, que luy & son peuple entendent par le liure de la loy, comment ilz doibuent viure & cheminer deuant Dieu, s'il n'astraint & foy & son peuple par vœus & sermens, de tenir ferme & inuiolable l'alliance du Seigneur: & ne luy suffit de ce faire, mais il fait d'auantage la pasque avec tous ses subiectz, en la plus grande magnificence que nul Roy n'auoit faict deuant luy: A fin que par ces choses corporelles & visibles, ilz montassent à la contemplation des spirituelles, celestes, & inuisibles: secouràs par ce moyen l'infirmité de leur foy, & declarans publiquement par telz signes & marques, qu'ilz estoient & vouloient tousiours estre &

demeurer le peuple de ce Dieu & seigneur qui leur auoit laissé & baillé ce sacrement pour vn tres certain tesmoignage, seau & gage de sa grace & faueur enuers eux. Car à cela ont esté instituez & baillez, tât à eux qu'à nous, les saincts sacremens. O que c'estoit, Sire, chose plaisante à veoir, qu'vne telle reformation ! qu'il faisoit bon cōtempler la face de ceste Eglise, qui n'a gueres estoit si tenebreuse, maintenāt si lumineuse ! qui n'a gueres estoit vn vray enfer, maintenant vn vray paradis ! O pleust à Dieu, Sire que par sa grace, & par vostre moyē nous peussions veoir celle de France ainsi restauree & reformee ! Pleust à Dieu qu'il peult estre dit de vous, ainsi qu'il est dit, comme par vn sommaire, de ce ieune Roy : Iosias donc osta toutes les abominatiōs de tous les païs qui estoient aux enfans d'Israël : Et feit que tous ceux qui se trouuerent en Israël, seruissent au Seigneur leur Dieu, ilz ne se retirerent point arriere du Seigneur, le Dieu de leurs peres, tout le temps de la vie d'icelluy. Certes, Sire, Dieu ne vous a point donné moindres occasions & moyens, pour reformer la religion de vostre royaume, qu'il donna à ce ieune Roy. Ains il vous en a donné de beaucoup plus grās, & en plus grād nōbre. Le mesme Dieu qui luy assisoit, vous assiste : & comme il luy commandoit de ce faire, aussi le vous commande il. Les mesmes enseignemens qui l'acheminoient, vous acheminent, & encores de plus certains. Car il nauoit  
qu'une

qu'une partie des liures de l'ancien testament. Avec tous ceux-la, vous avez ceux du nouveau. Et en ceux-la beaucoup de choses luy estoient baillees obscuremēt, & par figures: En ceux cy vous avez la claire & manifeste verité. Vous avez pour exemple luy, & infinis autres bons & fidelles Roys: Il en auoit bien peu, cōme estoit Dauid & Ezechias. Tous ses subietz, ou la plus part enuieillis en Idolatrie, ne se soucioient d'aucune reformation de la doctrine ny de la religion. La plus grand part des vostres ayāt soif de son salut, & de la gloire de Dieu, ne cesse de la vous demāder. Icelluy laissant la religion en tel estat qu'il l'auoit prise de son pere, ne craignoit seditiō ou reuolte de son peuple, vous faisant le semblable, voyez en quel dāger vous en estes tous les iours. Que sera ce donc si suiuant les traces de voz predecesseurs (que Dieu ne veuille) vous continuez les persecutions contre les enfans de Dieu? en cōbien plus grand dāger mettrez vous & vous & vostre royaume? Car comme dit Tertulian, *Apolog 30.* parlant aux Gētilz: Veu que si volōtiers nous allōs à la mort, & nous laissons meurtrir, quelle guerre ou cōbat ne serions nous idoines & promptz de soustenir, encore que ne fussions pareilz à vous de gēs. d'armerie? Si toutefois il n'appartenoit plus tost à nostre discipline & condition d'estre tuez, que de tuer. Ioinct que faisant du pis que vous pourrez, comme i'ay touché cy dessus, vous ne ferez autre chose

E. j.

*Luc 12.*

*2. Chro 11.*

*Thob. 1.*

*3. Roys 20.*

*1. Macha  
6. & 7.*

qu'irriter Dieu alencontre de vous : & perdre  
vostre peine & le temps. On a beau allumer  
des feus, pour amortir & esteindre l'ardeur de  
la foy des croyans. Le feu que le filz de Dieu  
dit auoir mis en la terre, qui est la parolle de  
l'Euangile, allumé par le soufflement du saint  
esprit es cœurs des esleus, n'esteint pas moins  
ces feus, que feroit toute l'eau de la mer. On  
en pourra bien faire mourir quelques vns:  
mais seulement ceux qu'il plaira à Dieu: & par  
la mort desquelz Iesus-Christ voudra estre  
glorifié. Mais la plus grand part eschappera,  
conseruant miraculeusement les siens le Sei-  
gneur, en despit des tyrans. En despit de Ie-  
roboam les sacrificateurs & Leuites qui estoient  
demeurans en Israël, & plusieurs du popula-  
ire, qui auoient proposé en leurs cœurs de ser-  
uir à Dieu, laissant leurs maisons & possessions,  
s'en allerent rendre en Ierusalem avec leurs  
freres: à fin de ne se souiller en l'abomination  
des veaux d'or. Thobie ne craignant le Roy  
ne ses edictz, & ne se souciant de la hayne &  
malveillance de ceux de sa lignee, Idolatres  
fuyoit leur compagnie & Idolatrie, & alloit  
trois fois l'an en Ierusalem, & là offroit ses sa-  
crifices au Seigneur. Maugré Achab & la fu-  
rieuse Iezabel, sept mille hommes que Dieu se  
reserua, demeurarent impolus, & ne flechirent  
le genouil deuant Baal. Maugré Anthiocus le  
tyran, & ses bourreaux, le Seigneur fut glori-  
fié & honoré par la constante confession, &

par les victorieuses morts du vieillart Eleazar, & des sept freres & leur mere. Mais Matha-  
thias & ses cinq filz, avec plusieurs autres, es-  
chaperent de ses mains: & ne les peut cōtrain-  
dre d'Idolatrer, ne les garder de s'assembler es  
mōtagnes, & cauernes, & là louer le Seigneur,  
& celebrer le iour du repos. Ainsi les Apo-  
stres & leurs successeurs, maugré Neron &  
tous les autres tyrans, glorifierent le Seigneur  
tant en leurs vies, qu'en leurs mors. Et en ces  
derniers temps, de mesme sorte a esté, est, &  
sera glorifié le filz de Dieu, par ses fideles ser-  
uiteurs. Car, Sire, si vous & vostre conseil ne  
voulez entendre à vne totale & generale re-  
formation de l'Eglise, ou si pour le moins, ne  
leur permettez quelque temple, ou publique-  
ment ilz puissent seruir à Dieu, toutes voz  
prohibitions & defenses, toutes voz confisca-  
tions, voire tous voz feus ne pourront em-  
pescher l'esprit de Dieu, qu'il ne les induise  
à s'assembler à tout le moins en leurs cham-  
bres, pour inuoquer Dieu, pour ouir sa parol-  
le & pour participer à ses sainctz sacremens:  
Et en ce faisant on ne les deura estimer he-  
retiques ou scismatiques: Si lon ne veult ta-  
xer d'heresie pour vne mesme cause les pro-  
phetes, & les Apostres, & toute l'Eglise an-  
cienne. Et pour le present nous serons con-  
tens de l'exemple que nous ont laissé ceux de  
l'Eglise d'Antioche, lesquelz cōme dit Theo-  
dore en sō histoire Ecclesiastique, apres auoir

1. *Matha*

Livr 2.  
chap. 31.

*Cen. 19.*  
*Matth. 5.*

*Theodor. l.*  
*4 cha. 14.*

*Psal. 82.*

*Iean. 16.*  
*Iean. 17.*

souffert l'abomination Arrienne l'espace de trente ans, voyans que la meschanceté croissoit de iour en iour, & qu'o leur faisoit la guerre, maintenant ouuertement, tantost en cachete: qu'on auoit aussi chassé leur saint euesque Meletius, & mis en son lieu vn heretique, ilz reduirent en memoire ce qui fut dit à Loth Salue ton ame. Et ce que dit Iesus-Christ, Si ton œil dextre t'escandalize, arrache le, & le iectes hors de toy, &c. Et puis se separans de la partie de la ville infectee de l'heresie Arienne, commencerent de faire leurs assemblees particulieres au temple apostolique, qui est au lieu qu'on appelle la vieille ville. Ainsi du temps de l'Empereur Valent. les fideles de Constantinoble furent contrains de s'assembler maintenant au pied d'une montaigne, tantost aupres d'un fleuve, &c. Nous faisons le semblable, & usant de ceste laborieuse & incommode commodité de seruir à Dieu, sommes appelez factieux & seditieux par noz aduersaires. Voire nous sommes iugez pour telz, & condamnez à mort par les iuges. De l'auuglement desquelz ie m'esmerueilleroie d'auantage, si la cause ne m'estoit declaree par l'escriture, à sçauoir, qu'ilz ne cognoissēt & n'entendent rien. Voire ilz font toutes ces choses (aux enfans de Dieu) pour ce qu'ilz ne cognoissent point mō pere ny moy. Dict le Seigneur. Or si ceste est la vie eternelle que les hommes cognoissent le pere seul vray Dieu,



& Iesus-Christ qu'il a enuoyé, certes au contraire, ceste est la mort eternelle qu'ilz ne cognoissent ne l'un ne l'autre. Dequoy il s'en suit que nous sommes assez vengez de ceux qui nous persecutent, quand pour nous apporter la mort temporelle, ilz remportent la mort eternelle. Parquoy ô Iuges qui auez quelque cognoissance de Dieu, & qui estes touchez de la crainte, maintenez & soustenez constamment la cause du Seigneur en plein iugement, & pour gagner la faueur des tyrans, ou pour crainte de perdre vos biens, vos estats, & vos vies, ne consentez contre vos consciences, ains opposez vous vertueusement aux meschans en la condamnation des innocens, & fideles seruiteurs de Dieu: comme fait Beneuolus Iuge en la ville de Milan, lequel non seulement refusa vne plus grande dignité, que luy presentoit la Royne Iustine *Hist. eccle. lib. 11. c. 16.* s'il consentoit au banissement de saint Ambroise, mais aussi volontairement se demist de celle qu'il tenoit. Mais pour reuenir à nostre propos, Sire, quant à ce que nos aduersaires appellent noz assemblees factions ou seditiōs, Tertulian les desment, disant, Ceste assemblee des Chrestiens seroit bien illicite, si elle estoit pareille aux illicites. Elle seroit à bon droit à condamner, si on s'en plaint comme de factiō. Mais au dommage de qui nous sommes nous iamais assemblez? Nous sommes cela mesme ensemble comme si nous estions *Apol. 39.*

tous dispersez, & qu'un chascun fust apart: sans  
blesser ne contrister personne. Quand gens  
de bien, fideles, & honestes s'assemblent, il ne  
fault pas appeller cela faction, mais bien vne  
court. Et au contraire, il fault appliquer le  
nom de faction à ceux qui conspirent en hai-  
ne des gens de bien, qui crient contre le sang  
des innocens. &c. Et certainement le pis que  
faisoient les Payens, mesmes à ceux qui s'al-  
sembloient, c'estoit de les chasser, & non point  
de les saccager, & tuer, comme on fait main-  
tenant. mais quoy? les seruiteurs de Dieu, cō-  
me i'ay tantost dit, ne pourront iamais estre  
induitz de laisser telles assemblees: ou bien  
ilz seront contrains de quitter vostre royaume  
& leur pais, pour aller obtenir pleine iouis-  
sance des choses qui leur sont icy deniees es  
regions & lieux, ou le Seigneur de sa grace,  
les administre & distribue par ses bons & fi-  
deles seruiteurs. Alors apres qu'une bone par-  
tie de vostre peuple sera massacree, & l'autre  
chassée, vous demeurerez destitué de subiectz:  
comme apres vne grande & vniuerselle pe-  
stilence, ou apres vne longue guerre. Et cer-  
tainement, Sire, c'est bien vne espee de guer-  
re, voire c'est vne grande desconfiture à un  
Roy, quand il est delaisé pour sa cruauté.  
Mais il vault mieux que nous monstions ce-  
cy par les parolles de Tertulien, suiuant le  
propos que nous auons tantost allegué. Nous

pouuions, dit il, sans prendre les armes, & sans  
vser de rebellion, mais seulement ne nous ac-  
cordans point avec vous, vous combattre,  
pour la seule hayne de la separation. Car si  
nous estans vn si grand nombre d'hommes,  
nous nous fussions retirez de vous en quel-  
que anlet du monde fort loingtain, certai-  
nement la perte de tant de telz quelz citoyens  
vous eust fait rougir de honte, pour vostre  
condemnation: voire vous eust puny pour no-  
stre separation. Vous eussiez esté pour tout  
certain estonnez, de veoir vne telle solitu-  
de & silence: Vous eussies regretté le demeu-  
rant de la cité quasi morte, pour y regner  
sur icelluy. Bref plus d'ennemis vous fussent  
demeurez que de citoyens: Combien qu'ayez  
mieux aymé nous appeller les ennemis du  
genre humain. Or certes nous sommes en-  
nemis, mais non pas du genre humain, ains  
plus-toist d'erreur. Voyla les parolles de Ter-  
tulien, graue autheur, parlant des fideles aux  
infideles. *Que sera ce donc, Sire, estant vo-  
stre peuple ainsi mutilé & diminué, si quel-  
que grande mortalité par le iuste iugement de  
Dieu, suruient, ou quelque emotion ciuile,  
ou l'une & l'autre? Que sera ce principalemēt  
de ceste Babylonne de Paris eniuree, & n'estāt  
iamais resaisie du sang des enfā de Dieu, si elle  
recommence à desployer sa rage contre eux?  
Que sera. ce d'elle, sinon ce que fust de ceste ar*

*Hist. Ec.*  
7.18. &  
19.

rogante seditieuse, & tumultueuse ville d'Alexandrie? Laquelle, cōme dit cest excellent personnage, & saint euesque Denys Alexandrin, apres auoir tué de ses mains la plus grande & la meilleure partie du peuple, en persecutant les saints: l'autre partie estant deffaicte par guerre ciuile, & l'autre qui restoit estant cōsumee par peste: fust reduite à vn tāt petit nombre de gēs, que c'estoit chose fort rare, de veoir vn hōme aux places d'icelle: laquelle au parauant estoit si peuplee, qu'à grād' peine pouuoit on cheminer par les rues, pour la grand' multitude des hommes. Et encor ne sçay-ie si Dieu se voulāt venger de tāt de sang espādu de ses seruiteurs, se contentera de semblable vengeance: & si plus tost il ne la ruinera du tout, n'y laissant pierre sur pierre, comme il fit Ierusalem ceste meurtriere des Prophetes, & du maistre des Prophetes, Iesus-Christ. Mais encor, Sire, que Dieu n'vse d'vne telle seuerité enuers vous & vostre royaume: si est-ce que vous chassāt tāt d'hōmes de voz terres, es païs de voz voisins, voire de voz anciēs ennemis, il pourra pour le moins aduenir, que vous en ferez debilité, & eux renforcez. Comme ce malheureux idolatre Iero-boam, par semblable moyen rendit Roboam son ennemi, n'ayāt que deux lignees des enfans d'Israel en sa dominatiō, plus fort que soy, qui regnoit sur dix lignees. Or, Sire, ie sçay biē que de vous mesmes n'exercerez vne telle rigueur enuers vostre peuple, q̄ de l'exterminer: cōme

1. *Chro.* 11.

aussi ne l'ont pas fait vos predecesseurs. Mais si vous le faiçtes, ce sera à la persuasiõ des casars, qui ont tousiours abusé des Roys, des Princes, & de leur Magistrat, les esguillonnât contre les enfãs de Dieu : lesquels ils appellés heretiques. Mais encor qu'ils fussent tels qu'ils disent, dequoy toutesfois par la grace de Dieu, ils sont bien loing, Ces grans zelateurs doiuent ils estre si delicats, qu'ils ne les puissent souffrir aucunemēt? Pour le moins ils ne leur deuroiēt estre plus rigoureux, qu'estoient leurs grands peres *Act. 23.* les Scribes & Pharisiens aux Saduciēs, qui leur estoient tant cōtraires en doctrine & religion. Et mesmes nous ne lisons point q̄ Iesus Christ eut dit qu'il les falloit chasser: biē est vray qu'il reprenoit leurs erreurs: cōme aussi les Scribes *Matt. 22.* & Pharisiens, disputans contre eux. Et certes ceux cy se deuroient contenter d'ainsi faire: & nō point esmouuoir les Roys & Princes, voire tout le monde à ruiner ceux qu'ils disent heretiques. Mais de qui prennent ils cest exemple, sinon des Ariens, Mācedoniens, & autres heretiques, qui persecutoient & chassoient, & qui incitoient les Empereurs heretiques comme eux, à persecuter & chasser les vrays Chrestiens? Car les Euesques fideles, & autres sainçts personages, faisoient tout autrement: & disoient communemēt à ceux, qui par quelque zele indiscret esmouuoient persecutiō, que la vraye Eglise n'a point coustume de persecuter: car c'est là vraye merque d'endurer persecution, & non point de faire persecution. Et

*Hist. trip.*  
11.3.

pource Socrates en son histoire, à bon droit taxe Theodose euesque, de ce qu'il auoit trop cruellemēt chassé des villes & villages les Macedoniens. Il taxe aussi Cyrille vn autre euesque, & son eglise d'Alexâdrie, de leur indiscretion & cruauté. Il est bien vray que Celestin

*Hist. trip.*  
11.12.

euesque de Rome, osta aux Nouatians heretiques, les temples ou ils s'affembloient: mais aussi permit-il à leur euesque Rusticule, de faire ses assemblees en cachette. Et encor ne leur vsa on point de telle rigueur à Cōstantinoble: car on

*Hist. trip.*  
11.10.

leur laissa leurs temples, cōme dit Socrates. Ce qu'on fit aussi par la permissiō mesme des Em

*Hist. trip.*  
9.2. & 19.  
& 16.

pereurs fideles, Constantin, Gratian, Theodose & autres: semblablement aux Ariens, Macedoniēs & autres heretiques. Mais quelcun demandera pourquoy on ne destruisoit ces heretiques, veu qu'ils infectoient plusieurs de leur heresie? Je respon que les bons Empereurs aimoient mieux les laisser aux sçauants & saints Euesques, pour les dompter & vaincre par le glaiue spirituel, que de les destruire par le materiel. Et aussi ces diligens & vigilans Pasteurs y faisoient si bien leur deuoir, que par l'aide du vray & grand Pasteur Iesus-Christ, les brebis n'escoutoient point la voix des mercenaires, & ne suiuoient point les estrangers. Et si pour quelque temps deceües elles les auoient suiuis, iusques à estre en dangier d'estre deuorees du loup, si est-ce qu'ils les retiroient à la bergerie, & ne perissoient point à iamais, à cause qu'elles estoient brebis du Seigneur, qui les gardoit. D'antage ces bons pasteurs poursuuoient de si

pres ces heretiques, par viues voix & doctes es-  
crits, qu'ils retiroient les vns de leurs erreurs:  
les autres ils les rendoient mattez & vaincus.  
Et estans par ce moyen descouuers leurs er-  
reurs, & cognus de tout le monde, leur heresie  
s'en alloit peu à peu en fumee: les bons Em-  
pereurs, & les vrayz pasteurs y tenās ce pendāt  
la main, qu'elle ne repullulast. Or donc, Sire,  
si nos aduersaires estiment tant leur sçauoir &  
doctrīne, & si peu celle de ceux qu'ils disent he-  
retiques, pourquoy ne la font ils esuanouir p  
semblable moyen? pourquoy chassent ils, &  
poursuiuent leurs aduersaires par glaiues &  
seus? pourquoy ont ils peur d'eux, & de leur  
doctrīne, sinon qu'ils se doutent que bien tost,  
& eux & la leur viendront à neant, par iceux,  
& par icelle? Pourtant, Sire, suiuant l'exemple  
de ces bons Empereurs, & de ses saints Eues-  
ques, ne permettez que ces caphars vous aigrif-  
sent par leur rage & enuie contre les seruiteurs  
de Dieu: à fin qu'il ne vous soit à bō droict re-  
proché, d'auoir vsé enuers eux de plus grande  
seuerité, que n'ont fait mesmes les Empereurs  
payens. Comme Adrian, & Marc Aurelle,

*Hist. eccl.*

4. 2. 13.



peine, qu'ils auoiēt procuree aux autres. Et cer-  
 tainement nous ne meritōs d'estre si rudement  
 traictez de noz ennemis: veu qu'ils ne sçauroiēt  
 dire autre chose de nous, & ne nous sçauroient  
 accuser d'autre heresie, sinō q̄ ne voulōs point  
 consentir avec eux, aux erreurs qui ont esté in-  
 trodruits en la Chrestieté, depuis quelque tēps.  
 Car ils ne prouueront jamais, que nous soions  
 errās en aucun article de la foy, cōme ont esté  
 les Ariens, Macedoniens, & autres heretiques,  
 en l'ancienne Eglise: qui toutesfois, cōme auōs  
 dit, ont esté tolerez par les Euesques & Empe-  
 reurs fideles. Quelle raison donc Sire, auriez  
 vous, de nous molester, n'estans cōuaincus d'au-  
 cune heresie, à l'apetit de ceux, qui seulement  
 pour leur vêtre, nō point pour le Seigneur Ie-  
 sus-Christ, cōme dit l'Apostre, font dissention  
 & scandales, contre la pure doctrine de la veri-  
 té? Or toutesfois ie n'enten par tout ce propos  
 olter au Magistrat la puissance du glaiue cōtre  
 les heretiques, seditieux & perturbateurs de la  
 tranquillité publique, cognus & conuaincus  
 pour tels. Combien que ie desireroie que plus  
 tost ils fussent corrigez par la discipline de l'E-  
 glise, que cōtrains par force & main armée, s'ils  
 sōt toutesfois corrigibles. Mais ie parle en tout  
 ce discours de noz Euesques, Moynes, & tous  
 Cafars. Lesquels s'ils sont, cōme ils disent, suc-  
 cesseurs & imitateurs des Apostres, & de ceux  
 qui prochainement leur ont succedé, ils se doi-  
 uent contenter du glaiue spirituel, qui est la pa-  
 rolle de Dieu, pour conuaincre les heretiques,

*Les Ariens  
 moient la  
 diuinité de  
 Iesus-  
 Christ, &  
 les Macedo-  
 niens, du  
 S. Esprit.*

*Rom. 16.*

& selon la doctrine de l'Apostre, apres la pre- *Tite*  
miere & secōde admonition les euter. Au de-  
meurāt, i'espere, Sire, que vous & nous trouue-  
rons grace & misericorde enuers le Seigneur:  
c'est que vous serez si bō, si sainct & vertueux  
Roy, que nous pourrons sous vous mener vie  
paisible & tranquille, en toute pieté & hōneste  
té: Pourueu toutesfois que de nostre costé ne *1. Timo. 2.*  
soyons ingrats: & ne mesprisions ses cōtinuels  
benefices, & graces enuers nous: ains en pure  
conscience, & de cœur parfait, linuoquiōs, &  
obseruions ses saincts cōmandemens. Car cer-  
tainement Dieu donne vn Roy sage, au païs *3. Rois 12.*  
qu'il aymē. Et si de vostre part, recognoissez a-  
uoir & tenir de luy, non seulemēt le royaume,  
mais aussi toutes choses. Si vous ne vous cōten-  
tez d'estre seulemēt Roy, mais estudiés d'estre  
tel Roy qu'il requiert de vo<sup>r</sup>, faisant ce qui est  
droit deuāt luy: chemināt es voyes des Roys le  
craignans: le cerchāt par sa parolle, avec toute  
diligence, & assidues prieres, sans fainctise, mais  
d'vn cœur parfait: abattant & extirpant les abo-  
minables idolatries de ce royaume, avec toute  
la fausse doctrine: & redressant la vraye, avec  
le pur seruice de Dieu: Vous monstrāt nourri- *Esaie 42.*  
cier de l'Eglise, c'est à dire employant vostre  
puissance, autorité & cheuance, à la conserua-  
tion d'icelle, & vous exhibāt aux yeux de voz  
suiets: vray & parfait exemple de vie saincte &  
irreprehensible: par laquelle ils soient guidez  
& adressez au chemin de la crainte, amour, o-  
beissance & seruice de Dieu, selon la forme &

*Ecl. 49.* pourtrait qu'il vous est représenté en ces Roys du peuple de Dieu, tant saincts & vertueux, & nommement en nostre ieune Iosias, à l'imitatiō duquel, l'Ecclesiastique vo' inuite par ce tant beau sommaire de sa vie, comme à vn tresbeau banquet, disant: La memoire de Iosias est ainsi qu'une composition de parfum, preparee par l'artifice d'un parfumeur. Elle est douce en la bouche d'un chacun comme miel, & comme la musique en vn banquet solennel. Il s'est porté droitement en la reformation du peuple: & a osté l'abomination d'iniquité. Il a dressé son cœur au Seigneur, & confirmé la crainte d'iceluy, au temps mesme des meschans. Au nombre desquels bons & vertueux Roys, de tresbon droit, peut & doit estre mis feu Edouard cinquieme ce ieune Roy d'Angleterre: auquel le Seigneur auoit tellement elargi ses graces, & luy si bien les faisoit servir à la gloire d'iceluy, & à l'utilité de son Eglise, que ie le puis bien egaller, pour le moins, au plus vertueux. La pieté, religion, & vertu duquel, ceste ieune pucelle Isabel sa sœur, à present Royne dudit Royaume, ensuit heureusement, en sorte, que ie desire, vous & tous les Roys & Princes qui se disent Chrestiens, luy ressembler en cela. Mais ne vous contentez pas, Sire, d'estre bon Roy au commencement, cheminant en la crainte & obeissance du Seigneur, pour vn temps. Comme fit Salomon qui en la fin mesla vn blasme parmy son hon-

*Ecl. 41.*

neur. Comme aussi fit Afa, & Amasias. Mais *1. Chr. 16.*  
encore fit pis Ioas, lequel se laissant abuser  
par les Princes idolatres, laissa la loy du Sei-  
gneur, se conuertit à idolatrie: & fit meurtrir  
le prophete Zacharie qui l'en reprenoit. Or *Matt. 10.*  
vous scauez, Sire, qu'il est escrit, que qui per-  
seuerera iusqu'à la fin, il sera sauué. Sur tout  
chassez les flateurs, comme peste, de vostre  
Court. Et que tous meschans, & qui ne crai-  
gnent point Dieu, n'ayent aucune accointan-  
ce avec vous. Ne donnez point facilement l'o-  
reille au conseil de ieunes gens, qui n'ont ex-  
perience des choses: Et vous souuience que  
Roboam fils de Salomon, pour ceste cause *3. Rois 12.*  
perdit les dix parts de son Royaume. Mais  
ce bon & sage Roy Dauid en son Pseaume  
cent & vnieme, vous apprēdra mieux qui sont  
ceux que vous deuez approcher pres de vous,  
& ceux que deuez euitier. Et à fin que ie ne  
vous tienne trop, ie vous prie, Sire, pour la  
fin, de faire vostre proffit de ceste exhorta-  
tion de ce grand Roy & prophete Dauid,  
ou pour mieux dire de l'Esprit de Dieu par-  
lant par luy: Vous Roys maintenant enten- *Psean. 2.*  
dez, & vous gouuerneurs de la terre, prenez  
instruction. Seruez au Seigneur en crainte,  
& vous esiouïssiez en tremblant. Baïsez le fils,  
de peur qu'il ne se courrouce, & que ne pe-  
rissiez de la voye, quand son ire s'embrace-  
ra tant soit peu. Aussi semblablement de cel-  
le qui vous est faicte au liure de Sapience. *Sap. 6.*

Or donques Roys escoutez, & entendez: vous  
Iuges des fins de la terre apprenez. Prestez les  
oreilles vous qui gouuernez les peuples: & qui  
vous glorifiez de la multitude des nations. Car  
puissance vous est donnee par le Seigneur, &  
principauté par le souverain: lequel fera en-  
queste de vostre vie, & sondera voz pensees.  
Pour ce qu'estans ministres de son royaume,  
vous n'avez iugé droictement, ne gardé la loy:  
& n'avez cheminé suiuant la volonté de Dieu.  
il vous apparoitra avec horreur, & bien tost:  
car iugemēt rigoureux sera fait de ceux qui sont  
par dessus les autres: Et puis apres il dict & cō-  
clud ainsi. Vous donques Roys des peuples,  
si vo<sup>s</sup> prenez plaisir en throsnes & en sceptres  
aimez sapience, à fin que vous regniez à tous-  
iours. Or ie prie le Seigneur Dieu, Sire, qu'il  
*Prouet. 8.* vous cōmunique en tous voz affaires sa diuine  
sapiēce, par laquelle seule les Roys regnēt: &  
qu'il vous instruisse & apprenne par son saint  
Esprit à prudemment & droictement gouuer-  
ner vostre royaume, selon sa bonne volonté.

F I N.

